

Pauro Korītio ezektsa bo ziwatahaka

Pauro Atenas nipayakze Korītio ezektsa bo niukuru sibo Sesus soho nitsasoko, anaeze nisispirikpoko, sizubarētsa Sesus humo sisprikporētsa niyziknaha. Iwaze sihumo ky ziwbaby estubaka isopyksapybyri ty nikara. Iwatahi Pauro sibo ziwatahaka wasaniha ty nisispirikpoko. Deus hyrikoso ituk ziknapykyryk tahi iwatsahi katsa kino niwatihi tanymyryky.

¹ Uta Pauro. Papeu ikiahatsa bo piwatahaka. Mytu Ky Sostenes tuk ahabo piwatahaka. Tuba-batu iakzohota Deus zikpeha kape niy:

— Ikia aparakbaha bo tsimy. Wasaniha ty kytsa sizubarētsa bo tsimytsaso — niy. Hyŷ iky.

² Ikiahatsa Korītio ezektsa asaktsa Sesus harere humo ziknapykyryknahatsa Deus harere piwabynaha, ahabo piwatahaka. Ikiahatsa kino Sesus Kiristu humo wasani tsimaha. Ikiahatsa hi:

— Sesus Kiristu mypehakatsa — tsimaha. Katsa kino niwatihi. Nanabyitaba kytsa tihi:

— Sesus Kiristu mypehakatsa — mykaranaha. Ikiahatsa bo piwatahaka. Ikiahatsa Deus tyryktsa iwatsahi ibo tsimypamykysokonaha Sesus harere bo hyŷ tsimykaranaha ihumo ahaspirikporētsa tsimoziknaha.

³ Deus hi myzo. Sesus Kiristu mypehakatsa my. Iwatahi ahatsyhyryze Deus bo mopamykysoko:

— O myzo Korītio ezektsa asahi Sesus humo sisprikporētsa tysisapywyky. Ikia Sesus Kiristu tuk tysipunihikwyky — my. Iwa Deus bo my.

Kiristu humo Deus Korītio ezektsa mynasisapywyky.

4-5 Ahasoho bo mytsaty myze Deus bo mynapamykysoko:

— O Deus ikia zuba amysapyrēnikita. Korītio ezektsa tysisapywyikik tysipokzitsi. Sesus Kiristu humo siharereziurētsa. Hawa wasania ty motsasoko ana hi pinymyrykynaha. Iwatsahi ahumo sihyrinymyrētsa. Aharere humo ba zikspiriktsokdanaha. Iwatahi kakurēta — my.

6 Tapara Kiristu soho ababo nitsasokoroze tsiwabytoktonaha iwatsahi iharere bo hyŷ tsimykaranaha.

7 Iwatsahi amy humo ahaku byri zeka ababo nyny my. Ihumo ahaspirikporētsa. Ihyrikoso ty ababo nyny my. Sesus Kiristu mybo myzik-sizo. Deus tatse mybarawy bo myzipehazo, ana hi taperyky. Tsipiperykynahaze amy humo ahaku byri zeka Deus hyrikoso ababo nyny my.

8 Deus pahapunihikwyky iwatsahi ihumo ahaspirikporētsa tsimoziknaha. Iwaze hi Sesus Kiristu myzik-sizoze ahakubyrisorokrētsa hŷ. Iwatsahi Deus harere humo batu ahaspiriktsokdahu, iharere bo yhŷ tsimykaranaha.

9 Sesus Kiristu myzik-sizoze iokzeka ahamysapyrētsa tsimoziknaha iwatahi pahatsumuēhī.

Korītio ezektsa taharere ty harapubeteheke nikaranaha.

10 Hawa Deus mytsaty mykara naha atsatu mykara iwaze pahatsumuēhī. Atahi zahawatawy Sesus Kiristu tuk tsimyzurukunaha iwatahi pahatsumuēhī. Deus tse Sesus Kiristu kino

mypehakatsa my iwaze Deus harere bo hyŷ tsimykaranaha.

11 O katukytsa Karoe tukytsa tihi:

— O kytsa Korītio ezektsa asahi Sesus humo sispirikporētsa mopaparahakanaha — nikaranaha.

Iwa zeka katukytsa ahape my:

— Kaharere tsiwabytoktonahaktsa! Sesus Kiristu pokzi ba taharere ty harapubeteheke zikykara — tsimaha. — Sesus pokzi ahahokanibyrihu ja. Ahasakimyi ja byitsa tu ustsa harere bo yhŷ tsimykaranaha. Tyhapepokzitsikinahaktsa! Hawa wasani my atsatu tynakaranahaktsa! — my.

12 Wastuhu kytsa tihi:

— O katsaktsa Pauro harere bo zuba yhŷ tsimaha — nikaranaha. Ustsa kino:

— O katsaktsa Aporo harere bo zuba yhŷ tsimaha — nikaranaha. Mektsatu:

— O katsaktsa Peduru harere bo zuba yhŷ tsimaha — nikaranaha. Ustsa:

— O katsaktsa Kiristu tuktsa tsimaha — nikaranaha.

13 Iwa tsimykaranaha zeka Kiristu metutu tsimaha. Utakta iharapatawyhyta humo batu ahasapyzeky hyrikosokda aha. Kiristu zuba ahasapyzeky nihyrikosokda. Kapokzitsibara humo tu zaharasusuhiknaha. Sesus Kiristu ahapehatsa mozik iwatsahi kytsa zaharasusukunaha. Iwatsahi batu taharere ty harapubetehe ba zikaha tsimaha. Ahasopyksapyhu ja. Katsaktsa myzubarētsa Sesus harere bo hyŷ tsimykaranaha iwatsahi ityryktsa tsimoziknaha.

14 Wastawyzik sizubabyitsa zuba iksiharasusuhik iwatahi kakurēta. Kirispu Kaijo ahatsa zuba iksiharasusuhik.

15 Iwaze kytsa batu tyso:

— Katsa Pauro humo nimyharasusu — iwa batu tyso.

16 Abaka mytsaty iky Estepanus ituk kytsa iksiharasusuhik. Asa zuba iksiharasusuhik.

17 Kiristu wasania ty mopamykysoko niytahi zikpeha. Kytsa ba ziksiharasusu niytahi batu typeha. Wasaniha ty motsasokoze:

— Sesus Kiristu iharapatawyhyta humo ahasapyzeky nihyrikosokda — my. Wastuhu kytsa sihyriny myryrētsa iwatsa tu sispirikpobysitsa tu anaharere humo batu siakparawy. Kiristu harere bo batu h̄y zikaha, iwatsahi ana humo hi Sesus harapatawyhyta soho batu siakparawy. Asahi:

— Anaharere humo hi batu sihyriny myry — mybarapetu mykaranaha.

Korītio ezektsa Kiristu humo sispirikporētsa moziknaha.

18 Deus harere wasaniha tsiwabynahaze:

— Sesus Kiristu iharapatawyhyta humo nihyrikosokda — tsimaha. Asahi Deus humo sispirikporētsa:

— O wasani. Deus tazikwy humo mymyokthyryk, Sesus nihyrikosokda naha humo hi mytsapuhripyrywy niyzik — tsimaha. Ustsa kytsa asahi Sesus humo batu sispirikpo:

— Amy skaraba Sesus nihyrikosokda. Iwa byizeka tisapyrēna ja — mybarapetu mykaranaha. Asaktsa sinini ykarawy bo maha.

19 Tubabatu Deus harere papeu humo ziwata-haka:

— Sihyrinymyrētsa tahaokze tu zuba sihyrinymyrētsa.

Mybarawy ezektsa tihi:

“O sihyrinymyrētsa babatsa” mytsaty ahabyitsa mykaranaha.

Kaokzeka batu sihyrinymyry. Si-hyrinymyrytsa hi mohokdanaha my — niy.

20 Sihyrinymyrētsa Deus okzeka batu simyharerewaby. Siharereharētsa, sihyrinymyrētsa kino niwatihi Deus okzeka batu simyharerewaby. Deus okzeka sihyrinymyrybyitsa tu zikzuruk-naha. Mybarawy ezektsa tihi — sihyrinymyrētsa — mytsaty ahabyitsa mykaranaha.

21 Iwaze sispirikpobyitsa sispirikpobyiza kino niwatihi mypeka:

— Batu ahahyrinymyry h̄y. Sesus mysapyzeky nihyrikosokda tsimykaranaha. Anahi batu wasani — mybarapetu mykaranaha. Deus hi tsihyrinymyrēta h̄y. Katsa ibo mymyoktyhyryk Sesus harere bo hȳy tsimykaranaha iwatsahi ihumo myspirikporētsa. Katsa batu myhyrinymyry Deus zuba tsihyrinymyrēta. Iwaze iharere bo zuba hȳy tsimykaranaha iwatahi mymyoktyhyryk.

22 Sudeutsa mype iwatawy ty tsimaha zeka iwaze myspirikporētsa tsimoziknaha. Sudeutsabyitsa mype iharere humo tanymyry tsihikik iwaze myspirikporētsa tsimoziknaha. Hawa Deus zikwy mykara ana bo hi iktsa tsimaha ana humo hi hȳy tsimaha.

23 Iwaze katsaktsa Sesus iharapatawyhyta humo nihyrikosokda naha tsiktsasokonaha. Anaharere humo hi Sudeutsa batu siakparawy. Sudeutsabyitsa kino niwatihi ana humo hi batu siakparawy. Anaharere Sudeutsabyitsa batu siwabyhy. Mype:

— Ikiahatsa ahatyrykmyitsa anaharere kytса mysimyiwy — mybarapetu mykaranaha.

24 Katsaktsa Deus nimywatawy Sudeutsa, Sudeutsabyitsa kino niwatihi mybo iharere Sesus iharapatawyhyta humo nihyrikosokda ana humo hi tisapyrēna. Anahi mybo Deus wasania ty my. Sudeutsa, Sudeutsabyitsa kino niwatihi Sesus Kiristu nihyrikosokdaze Deus tazikwy ziwatawy. Tsihyrinymyrēta babata nimywatawy.

25 Kytса tsikaeni zuba sihyrinymyry Deus zuba ihyrinymyryta babata. Katsa mypunihik tsikaeni zuba Deus ba hawa tohi zikzuninaha. Sesus ni-hyrikosokdaze aparakbaha:

— O Deus batu takta batu zibetesа — ahabyitsa tuja mytsaty mykaranaha. Hawa Deus mykara kytса okzeka batu punihik baija mytsaty ahabyitsa tuja mykaranaha.

26 Katukytса mytsatyziutaha! Tapara Deus za-hawatawy batu ahahyrinymyry. Mybarawy ezektsa ahasoho humo:

— O batu sihyrinymyry — nikaranaha. — Ahatuk batu myhyrizikwytsitsaka. Batu ahatuk ahanamyrētsa. Batu ahahyrinymyrtса.

27 Deus zahawatawyze ihyrytsa tsimoziknaha iwaze mybarawy ezektsa sisikpybyrētsa. Asaktsa mybarawy ezektsa batu myhyrizikwytsa asahi Deus nisiwatawy iwaze mybarawy ezektsa

sisikpybyrētsa. “Katsaktsa myhyrinymyrētsa, myharerewabryrētsa iwatahi Deus nimywatawy” – mytsaty ahabyitsa tuja nikaranaha.

²⁸ Asaktsa mybarawy ezektsa myhyrizikwybyitsa asahi Deus nisiwatawy ihyrytsa moziknaha iwatsahi mybarawy ezektsa sisikpybyrētsa. Iwaze amy ty mybarawy ezektsa mytsaty nikaranaha, aty soho humo – O atakta abazubata tsimaha – mybarapetu nikaranaha. Deus okzeka anahi mahani.

²⁹ Iwaze batu aty tohi kasoho ty Deus myhareziuwu.

³⁰ Deus hi myhumo tsimypokzitsiarēta. Sesus Kiristu mymyoktyhyryk iwaze iharere humo tanymyry ituk tsinapykyryknaha. Ihumo myspirikporētsa atahi mymybetesaka. Iharere bo zuba hyŷ tsimykaranaha iwaze Deus myhumo:

– O asaktsa simysapyrētsa moziknaha – my. Kiristu humo myspirikporētsa. Iwa Sesus Deus bo mymyoktyhyryk ityryktsa tsimoziknaha.

³¹ Iwaze mysoho ty ba zikmyziuwynaha. Deus harere papeu humo ziwataha:

– Tahasoho ty sobyizeky ahasopyksapyhu ja mypehatsa soho zuba tynatsasokonaha – Deus papeu humo niy.

2

Uta ababo ikzumuze kapetu ikykara – O Sesus iharapatawyhyta humo nîhyrikosokda – ana hi motsasoko.

¹⁻² – O Sesus Kiristu soho zuba sibo iktsasoko. Hawa iharapatawyhyta humo mysapyzeky nihyrikosokda iwa kapetu ikykara. Iwatatu ababo

ikzumu iwatahi Sesus Kiristu soho zuba ahabo iktsasoko. “Utakta kahyrinymyrēta” sasabyitsa harere humo ka ba ziktsaso, kasoho baba humo ka ba ziktsaso, Sesus Kiristu soho humo zuba iktsasoko.

³ Ahabo ikzumuze kapybyrēta ikykara. Kaharere humo ja Deus ba iakparawy ikykara tahi ana pokso hi kapybyrēta ikykara iwatahi iktydy-dykyk tu.

⁴ Deus harere ahabo iktsasokoze ba ihyrinymyry taziwazy. Siharere hokdaharētsa kaharere amypubara. Iwa ikpamykysoko Deus hyrikoso katuk mynapykyryk atahi tazikwy ty kabon nyny niy iwatahi wasani ikykara.

⁵ Iwaze Sesus humo ahaspirikporētsa. Kaharerebara humo tu ahaspirikporētsa, Sesus humo ahaspirikporētsa Deus hyrikoso humo tsikspirikpokonaha hŷ —.

Sesus Kiristu humo zuba myspirikporētsa tsi-moziknaha.

⁶ Kytsa Deus hyrikoso bo hyŷ maha Deus hyrinymyrywy baba humo sihyrinymyrētsa asa bo hi motsasoko. Kytsa batu sispirikpo anaharere humo hi batu sihyrinymyry. Kytsa ustsa pehatsa siharere humo batu tyso. Aba zuba siharere piwabykynaha iwa zeka aibaka baziwabyzonaha. Deus siharere zepyk. Kytsa siharere humo myspiriktsokdanaha.

⁷ Deus ihyrinymyrēnikita. Deus harere ahabo motsasoko iwaze iharere tsipiaksenaha. Deus ta koikny baktatu mype niy:

— Katse iharapatawyhyta humo mohyrikosokda iwaze hi kytsa kabo mynasioktyhyryk – niy. Taparaka ana harere tsihokdaharēna abaka mahani. Anatyhi zahawatawyky.

⁸ Taparaktsa mypehatsitsa ana harere ka batu siwabyhy. Zinymyrynaha zeka Sesus Kiristu harapatawyhyta humo ba zihyriziknaha. Ata zuba imysapyrēnikita. Ata zuba wasanikita.

⁹ Tubabatu Deus harere papeu humo ziwatahaka:

— Deus isapyrēnikia ziperyky, kytsa bo zinyny tsihikik eze tu.

Abazuba isapyrēnikia. Batu aty tohi isapyrēnikia inyhy maha.

Batu aty tohi isapahanikia soho ty waby.

Batu mytsaty zikaha isapahanikia wata batu nawaha ja ziky – niy.

¹⁰ Ana humo hi Deus nimywatawy. Taparaka tsihokdaharēna abaka batu ihokdaha. Deus hyrikoso hi mytuk mynapykyryk iwatsahi myhyrinymyrētsa. Deus hyrikoso ihyrinymyryta babata. Hawa Deus mozihikik naha humo tsihyrinymyrēta. Tsizubarēna humo inymyryky atahyrikoso hi Deus isapyrēnikia ty mywatawyky h̄y.

¹¹ Katsa myhyrikoso zuba, myhumo tsihyrinymyrētsa. Ustsa kytsa batu sihyrinymyry. Atsawatu hawa Deus mozihikik ihyrikoso zuba tsihyrinymyrēta ihyrikoso zuba isapyrēnikia soho humo tsihyrinymyrēta.

¹² Asaktsa Sesus humo batu sispirikpo Deus hyrikoso situkbyitsa hi. Katsa myspirikporētsa hi Deus hyrikoso mytuk mynapykyryk iwatatu Deus

wasania ty mykaranaha humo tsipinymyryky-naha. Mybarawy ezektsa iharere bo ba hÿ zikaha, asahi Deus sapynikiaty batu tyso zikaha.

13 Iwatahi iharere humo zahahyrinymyryky at-satu Deus hyrikoso zikyrinymyryky. Kaharere zuba bara humo ba zahahyrinymyry. Deus harere humo pahahyrinymyryky, iwaze ikiahatsa ana harere bo hyÿ tsimykaranaha.

14 Aty Deus hyrikoso ituk byizeka Deus harere batu ziwaby. Iharere tsihokdaharëna iwaze batu hÿ mykaranaha. Deus hyrikoso bo batu hÿ zikaha. Kytsa Deus hyrikoso situk mynapykyryk nahatsahi asa zuba Deus harere bo yhÿ mykaranaha.

— O iharere wasani — maha. Deus hyrikoso humo ka.

15 Aty Deus hyrikoso ituk mynapykyryk atakta tsimytsatyhyziurëta. Wasaniha humo tsihyrinymyrëta. Imysapybara humo tsihyrinymyrëta. Asaktsa kytsa harere zuba piwabykynaha asahi batu sispirikpo. Asaktsa kytsa Deus hyrikoso bo hyÿ mykaranaha nisimyijakanaha sihumo batu sihyrinymyry. Deus harere tsihokdaharëna iwatsahi iharere humo zisohometukunaha.

16 Deus harere papeu humo:

— Deus mytsaty mykara naha humo batu aty tohi ihyrinymyry.

Ba aty tohi Deus zihyrinymyry — niy.

Katsaktsa Kiristu watsa mytsaty tsimykaranaha, ihyrikoso mytuk mynapykyryk. Iwa my.

3*Deus tsumuēhītsitsa.*

¹ — O katukytsa ikiahatsa bo ikpamykysoko eze tu asahi Deus harere bo hyŷ mynakaranaha iwa ahabo ikpamykysos tsihikik. Batu zik. Ikiahatsa Deus harere bo tsikaeni zuba hyŷ tsimaha iwaze jabyitsa watsa Deus harere bo tsikaeni zuba hyŷ tsimaha. Iwaze Deus harere bo batu ma zikaha. Ikiahatsa jabastsa watsa.

² Iwatsahi zahahyrinymyryky jabastsa watsa tsikaeni zuba tsipinymyrykynaha. Siipyktsa watsa zahahyrinymyryky batu ziky. Abaka batu wabyziu tsimaha jabastsa watsa tsimaha. Deus harere bo tsikaeni zuba hyŷ tsimaha iwa batu ahahyrinymyry. Sibykyhytsa tahaopuwytса zuba mynasikzukuknaha siraratsani ba ziboronaha, siwatsa tsimykaranaha iwatahi Deus harere tsikaeni zuba pahahyrinymyryky. Deus harere ba ziakse tsihiknaha.

³ Ikiahatsa ahatuk tu zeka tsahazokdir̄etsa. Ahatuk tu zeka tsimyhapepehaïkiknaha tsahasakimyijar̄etsa.

Iwa sisopyk tsa humo ka tsimykaranaha zeka sispirikpobyitsa watsa tsimyzurukunaha iwa Deus hyrikoso situk batu mynapkyryk. Iwatahi batu pahahyrinymyry Deus soho tsikaeni zuba tsinymyrynah.

⁴⁻⁷ Wastuhu kytса tihi:

“Katsaktsa Pauro tuktsa tsimaha” nikaranaha. Ustsa kytса kino:

“Katsaktsa Aporo tuktsa tsimaha” nikaranaha. Iwa tsimytsasokonahaze sispirikpobyitsa watsa tsimyzurukunaha. Iwatahi aty zeka Kiristu

soho ababo nitsaso batu myhyrizikwy. Aty zeka Deus harere zahahyrinymyryky batu myhyrizikwy. Deus abazubata iwata humo hi tsahaspirkporētsa tsikyziknaha izikwy humo. Atakta imysapyrēnikita. Aporo pykyhy myhyrizik byita my.

Uta kino niwatihi pykyhy myhyrizik byita my. Sesus Kiristu zuba abazubata my. Katsa Sesus Kiristu soho tsimytsasokonaha. Deus mytsumuēhītsitsa tu wasania ty Sesus Kiristu soho ty ababo tsiktsasokonaha iwaze ihumo ahaspirkporētsa. Mypehatsa nimypehaka iwatsa tu tsimykaranaha. Hawa tsimykaranaha mytsuhuk wata tsimaha. Anaeze siriktsa katsa mysipariknahaze. Uta ababo Kiristu iksasokoze anahi siriktsa watsa, iharere ahatuk iparikik, bykyze Aporo ababo izumu. Deus harere humo zahahyrinymyryky atakta hyritsik waha humo zahahyrinymyryze.

Deus humo zuba siriktsa myzepobaiknaha, izikwy humo riktsa tahaypyknaha. Iwa Deus Sesus humo ahaspirkporētsa tsimoziknaha izikwy humo, siriktsa watsa mozipobaiknaha ikiahatsa izikwy humo ahaspirkporētsa. Hawa siriktsa ty waratok buruk nisiparikik tawata Deus harere bo mytsatyziu tsimykaranaha iwaze wasani tsimykaranaha.

⁸ Deus okzeka aty Kiristu soho motsasoko bykyze usta Deus harere humo mysihyrinymyryky atsatu maha. Hawa wasani mykara ana ty hi anahuak ty ibo nyny my. Aty tarabajawy humo wasani my zeka sizubarēna ty nyny my. Aty tarabajawy humo pykyhytu ziky

byizeka ihuak ty tsikaeni zuba nyny my. Wasani my zeka anatyhi ibo nyny my – niy.

⁹ Katsaktsa Deus tuktsa. Izikwy humo mytarabajawy humo mysopykziurētsa. Ikiahatsa Deus tsuhuk watsa iwa botu nitsasoko.

Ikiahatsa niwatihi Deus wahoro watsa atahi zihitsa wata pahapokzitsiki.

¹⁰ Kytsa wahoro uruktsa. Suwy tsioketsihezzirēta zeka ba ziknaktsehepetok. Uta Kiristu soho ababo iktsasoko, ana harere bo hyŷ tsimaha iwatatu ikiahatsa batu sinini ykarawy bo tsimaha. Deus hyrikoso katuk mynapykyryk iwaze sispirikpobysitsa bo Sesus Kiristu motsasokoro. Deus wasania ty motsasokoze wahoro uruktsa tsawata, iwatahi wahoro ba ziknatsehepetok. Abaka usta pahahyrinymyryky, atakta pykyhytu pahahyrinymyrykyta! Atahi maku wahoro mozoknikize tawata my.

¹¹ Sesus Kiristu mybarawy bo botu izumu Deus hi:

— Katse humo zuba ahaspirikpohuktsa! — niy. Wahoro mozokninahaze tawata zisapybaik iwazeka wahoro ba ziknatsehepetok. Anawahi Deus tse mybarawy bo zipeha iwaze katsa batu sinini ykarawy bo tsimaha. Ata humo zuba Deus bo mymyokthyryk.

¹² Atakta pahyrinymyryky wahoro suknitsitsa watsa. Wastu zuba wahoro tisapyrēna niaha. Utsa batu, tahastuw y zuba mozoknikinaha. Wahoro suknitsitsa harahare sipokztsihikitsa iwa anatyhi mozoknikinaha. Asahi sihyrinymyrētsa watsa. Ustsaktsa tahastuw y zuba watsa mozoknikinaha. Asahi hwitsa ty waharazipaty,

towahaditsa iwahaty mozoknikinaha. Asahi si-hyrinymyrybyitsa watsa maha.

¹³ Izo wahoro zipa zih humo mynapokze mokorobaik. Wahoro haraharetса suknihu zuba zekyba zikoro. Aty zituwy mozokni zeka kytsa piny-naha tahastuwy mokorobaiknaha humo. Kytsa siso humo maha:

— O asaktsa batu pykyhytu zikaha — maha. Siwatsa hi Sesus Kiristu myziksizoze asaktsa pahahyrinymyryziuku zeka asa humo hi myhyrinymyryetsa. Ustsa batu sihyrinymyryziu asa humo hi myhyrinymyryetsa. Pahahyrinymyryziuku zeka Sesus humo ahspirikporētsa tsimoziknaha. Ahaty sihyrinymyryziu byitsazeka tsikaeni zuba Sesus humo sispirikporētsa.

¹⁴ Aty Deus harere humo zahahyrinymyryziuku zeka ata zuba Deus itarabaja huak ty nyny my.

¹⁵ Aty itarabajawы humo ahahyrinymyryziu by-izeka batu ihuak ty nyny my. Deus hi:

— Atakta kaharere humo batu imyhyrinymyryziu iwaze batu ihuak ty ibo nyny my. Maku iwahoro mokoro zeka izo pokso mowakik inamy mokorobaik zuba. Atakta batu ihyrinymyryziubyita wata my — niy.

¹⁶ O mytsatyiutahaktsa kytsa! Deus hyrikoso ahatuk mynapykyryk iwatsahi ikiahatsa Deus wahoro zubata ezektsa watsa tsimaha. Ana humo hi asiba tsikspiriktsokdanaha.

¹⁷ Deus wahoro zubata tisapyrēta. Iwa mytsaty my. Ikiahatsa iwahoro watsa tsimaha. Iwatahi ikiahatsa ahamysapyrētsa mytsaty mykara. Asahi pahamyiwykynaha Deus mysininiwyky. Asaktsa

kytsa pahamyiwykynaha Deus mysipeha sinini ykarawy bo my.

18 Kyze batu zikaha pe spihikbatanaha. Batu tyso — Katsaktsa myhyrinymyrētsa. Sispirikpobylitsa okzeka myhyrinymyrētsa hÿ — mytsaty ahabylitsa tsimaha. Ahaharere ty pyktaha. Ahaokze ka ahahyrinymyrētsa watsa Deus okzeka batu wasani tsimaha. Ahaokze ahahyrinymyry byitsa eze ka Deus okzeka ahahyrinymyryrētsa tsimaha.

19 Mybarawy ezektsa asahi:

— Katsaktsa myhyrinymyrētsa — mybarapetu maha. Deus sisoho humo:

— Ikiahatsaktsa ahahyrinymyrybyitsa. Batu amy tohi humo ahahyrinymyry — my. Deus harere papeu humo ziwatahaka:

— Mybarawy ezektsa sihyrinymyrētsa mybarapetu sisopyk mykaranaha — niy.

Iwa niy.

20 Deus papeu humo ziwataha:

— Mybarawy ezektsa siharere batu imysapy my. Siharere zuba. Siokze zuba siharere tisapyrēna Deus okzeka batu sapy, atahi tsihyrinymyrēta — niy.

21 Iwaze batu aty tohi Deus okzeka ihyrinymyryta. Iwatatu kytsa soho humo batu tyso — O atakta iktsazuba mynakarata tsimyharerewabyrēta tsimy — nawa batu tyso.

22 Ikiahatsa tsizubarēna tsimaha Kiristu ahapehaktsa humo. Utakta batu. Utakta ahatsumuëh̄itsa zuba. Aporo, Peduru iwatsa ahatsumuëh̄itsitsa. Deus mybaratsa mybarawy bijoikpe iwa nizukni ahatsyhyryze nizukni. Abaka

pahapokzitsiki. Tsimyhyrikosokdanahaze pahapokzitsi. Iwaha buruk tu tsimyzurukunaha zeka pahapokzitsiki. Iwa myzahapokzitsiki.

²³ Deus hi Kiristuzo babata. Ikiahatsaktsa Kiristu tyryktsa tsimaha. Iwatahi ahabo tsizubarēna ty nyny my hÿ.

4

Kiristu ykzohotsa.

¹ Uta, Aporo ahatsa niwatihi katsa Kiristu tsumuēh̄tsa tsimaha. Ahasoho bo kytsa mytsaty mykaranaha. Taparaka Deus harere tsihokdaharēna abaka batu ihokzaha, ana hi mybo zi-watawy anahi ahabo tsimytsasokonaha. Katsa Kiristu tsumuēh̄tsa iwatsahi myhumo ahamypokzitsiuhektsa kytsa!

² Ipehatsa tatsumuēh̄tsa pe:
— Kaharere bo zuba hyÿ tynakarata — my. Ata wahi niaha Deus mype my:
— Kaharere bo zuba hyÿ tahaktsa — my. Yhÿ tsimykaranaha. Iwa hÿ.

³ Kytsa kasoho humo:
— O Pauro wasani mykara — mykaranaha. Ana humo batu kawabyhy. Ustsa kasoho humo:
— O Pauro batu wasani mykara — mykaranaha. Ana humo kino batu kawabyhy. Kapetu my zeka
— O utakta wasani mokuru — my. Kamysatyhybyitatutu batu kahyrinymyry Deus zuba kasoho humo tsihyrinymyrëta.

⁴ Kaokze ka wasani mozuruku tawata iwatatu sizubatsa batu kape zikaha:
— O Pauro Deus okzeka wasani my — iwa batu zikaha. Kapehatsa Sesus okzeka:

— Pauro wasani mykara — my. Iwa motsasoko zeka kamysapyrēta mozik. Ata zuba mytsatyziu mykara.

⁵ Iwaze abaka ustsa soho ty soso byitaha — O asaktsa Deus okeze batu simysapy maha — tsimaha. Iwa batu tyso. Sesus Kiristu myziksi- zoze ata zuba kytsa soho motsasoko. Ata zuba mytsatyziu. Hawa kytsa papatu tsinakaranaha humo tsihyrinymyrēta. Tsinazihikiknaha humo tsihyrinymyrēta. Atahi mytsatyziu mykara atahi mype:

— O ikiahatsa wasani tsimykaranaha — my. Ahamysapyrētsa zeka iwa motsaso. Iwatahi iharere taperyky.

⁶ Ikiahatsa tsimaha zeka — O Pauro tsimyhar- erewabyrēta iharere humo waby zuba my. Aporo humo ka batu. Iharere bo ka waby waby byi- taha — tsimaha. Iwa tsimytsasonaha zeka Deus harere papeu humo ziwatahaka batu hŷ tsimaha. Iharere tihi:

— Deus aparakbaha nimysukni. Iwatsahi astsabarētsa tsimaha. Myzubaha bo iksa zuba mysopyk tsimaha — niy. Mytsasokoze kasoho Aporo kino niwatihi, anaharere hawa kytsa ahasopyk tsimaha pahawatawyky.

⁷ — O katukytsa Deus okzeka astsabarētsa maha. Ba aty tohi ihumo meky watu my. Iwatsahi astsabarētsa tsimyzurukunaha. Isapyrēnikia ty Deus hi ahabo nyny my. Iwatsahi ahaokze ka:

“O katsaktsa myharerewabyrētsa” tsimaha zeka, ahape tu ahasopyk mytsaty ahabyitsa tsimykaranaha. Iwaze isapyrēnikia ty Deus ahabo nyny my zeka batu tyso:

“Mysapyrētsa humo Deus isapyha ty mybo nyny my” – mybarapetu tsimykaranaha.

8 Ikiahatsa hi:

– O katsaktsa tsizubarēna tsimaha. Katsa zuba myhyrinymyrētsa. Katsa zuba mynamyrētsa tsimaha. Deus tuk ustsa kytса bo mysiakzonaha Pauro ta batu. Aporo kino batu. Katsa zuba – iwa mybarapetu tsimykaranaha. Ikiahatsa ustsa bo tsimymyzkokonaha zeka kakurēta my. Ustsa bo tsimysiakzokonaha zeka katsa niwatihi ahatuk ustsa bo tsimysiakzokonaha hÿ. Iwa batu my.

9 Kaokzeke Deus humo kytса mysoho mytsaty mykaranaha:

– O sакtsa batu siakparawy – maha. Deus ykzhotsa tu kytса okzeka batu mykparawy tsimaha. Iwatsahi kytса ahahumo batu simyharerewaby. Kytса sakmyitsaktsa ustsa sisopyk:

– O tysibaiknaha – maha. Iwa mysopyk maha. Kytса myhumо mymysupehekeknaha. Sizubarētsa mybo iktsaziu mykaranaha. Paikpa iksa mykaranaha. Mybarawy ezektsa bijoikpe ezektsa kino niwatihi mybo iktsaziu mykaranaha

10 Sispirkpobyitsa mysoho tihi:

– O asaktsa Kiristу pokzi sityrykmyitsa mykaranaha. Ikiahatsa ahahyrinymyrētsa – tsawatsa mytsaty ahabyitsa tsimykaranaha. Kiristу humo ahaspirikpobyitsa iwatsahi ikiahatsa tihi:

– O Katsaktsa mypunihikrētsa, ikiahatsa myokzeke batu ahapunihiktsa – mytsaty ahabyitsa tsimykaranaha. Ikiahatsa ahamyharerewabryrētsa katsaktsa batu. Katsaktsa batu mykparawy. Iwa mytsaty

ahabyitsa tsimykaranaha. Hawa mytsaty tsimykaranaha batu wasani my.

¹¹ Abaka myraparētsa, myrapukrētsa, mysukbyitsa, mywahorobyitsa. Ustsa kytsa mymykikinaha mymymyijaikiknaha. Iwa tsimyzurukunaha.

¹² Mydisahawy huak bete tarabaja tsimykaranaha. Mysuk huak humo niwatihi. Katy parabyry ahabyita ikykara. Kytsa mysoho humo nimysapybyrikinahaze batu myty tsapusare. Katsaktsa Deus bo sitsyhyryze tsimypamykysokonaha, iwaze hi Deus mysipokzitsiki. Mymysukyrykynahaze batu tyso myakubyrisorokrētsa.

¹³ Kytsa sisakparēnikitsa mysoho humo mymysapybyrikinaha katsaktsa batu isty myija tahasapywykynaha zuba. Asaktsa Sesus humo sispirikpobyyitsa siokzeka katsa ykpyri watsa tsimaha. Abaka iwa mytsaty mykaranaha.

¹⁴ Iwa ababo motsasokoze batu ahasikpyby, kapehawy zuba tsipiwapabtoktonaha anahi mozhik. Uta ahahumo kamypokzitsiarēta. Ikiahatsa kahyrytsa watsa tsimaha, iwatahi pahasapywyky.

¹⁵ Sizubarētsa pahahyrinymyrykynaha iwatsatu estuba zubata ahazo my. Tapara Sesus Kiristu humo ahaspirikporētsa tsimoziknaha kaharere humo. Uta Deus wasania ty ababo iktsaso iwaze Kiristu humo ahaspirikporētsa. Iwatahi uta ahazo wata my.

¹⁶ Iwatahi kapehawy tihi:

— Kasopykwatu tuzurukunahaktsa kytsa! — my.

¹⁷ Iwatahi Timoteo ababo pipeha. Atahi katse wata. Wasani mozuruku. Uta ihmō kamypokz-

itsiarēta. Kiristu harere humo meky watu mozuruku iwa pahahyrinymyryky. Timoteo hi:

— Nanabyitaba Pauro mysihyrinymyryky – my. Asaktsa inakypyknahaze Sesus tuktsa humo attatu pahahyrinymyryky iwaze kaharere humo ba zikspiriktsokdanaha.

¹⁸ Wastuhu kytsa ahatuk:

— Katsa zuba wasani tsimaha. Mysapyrētsa tu Pauro mybo ba zikziksizo – tsimaha. Iwa mytsaty tsimykaranaahaze ahaokze ka sihyrinymyrytsa hyritywatsa mytsaty ahabyitsa tsimykaranaaha.

¹⁹ Deus kape my zeka aba ababo mynakozore. Asaktsa tahaokzeka sihyrinymyryētsa sibo mynakozore. Kapetu kasopyk:

— Asaktsa sihyrinymyryētsa ja. Deus zikwy humo mozurukunaha ja. Siharere bo zuba mykaranaaha – my.

²⁰ Katsa Deus tyryktsa tsimoziknaha zeka iharere bo zuba hȳ tsimykaranaaha iwaze hi izikwy humo tsimyzurukunaha. Tsimytsasonaha zeka — O Deus mypehatsa tsimaha, iwaze iharere humo batu h̄y tsimaha — mybarapetu tsimykaranaaha.

²¹ Iwaze ababo mynakozoreze pahabetsak. Hawaha humo tsimyzurukunaha zeka pahabetsak. Hawa skaraba ahapokzitsi tuktu ababo pomo tsimyzihikiknaha iwaze ahasapybyitsatu tsimykaranaaha, niwazuba pyktahaktsa. Ikiahatsa tsipinymyrynah. Iwa my.

5

Korītio ezekta imysapybyita nikara.

¹ Kyze Korītio ezekta tazo oke ziakse atahi Sesus tukta iwatatu tazo oke ziakse. Ana harere iwaby batu isapy my. Sudeutsabyitsa asahi Sesus humo batu sispirikpo iwa ba zikaha, sisikpybyrētsa. Hawa niy ha ikiahatsa batu h̄y tsimahaze iwaze Deus okzeka batu isapy my.

² Ikiyahatsa ja. — O katsaktsa mysapyrētsa — tsimaha. Iwa batu tyso. Batu ahaku! Imysapybyita nikara ihumo typukarakanahaktsa! Atahi isapybyitahi ababo ba zikumu! Tsinakypyknahaze ipe tsimaha:

— Nabo pāoty Deus wahoro bo mytuk ba ziktsuk — tsimaha.

³ Abaka batu ahatuk mynapykyryk iwatuze ahasoho bo mytsaty mynakara. Atakta imysapybyita nikara botu isoho ziwabybanaha:

— Atakta Deus okzeka batu imysapy my. Deus harere humo botu ipe my nabo pāoty ahatuk ba zikumuta! Ahasopyksapyziuhu — my.

⁴ Tsinakypyknahaze Sesus Kiristu hyrikoso ahatuk mynapykyryk. Izikwy ahatuk mynapykyryk. Uta niwatihi ahatuk mopykykze tawata ababo mytsaty mynakara.

⁵ Iwa tsiknakyknahaze imysapybyita pe:

— Satanas harere bo zuba ma tsimy atahi apehatsa mozik — tsimaha. Iwa tsimaha zeka tozeka ja mohyrikosokdaze. Tozeka ja tamysapybyri pimoewy. Tamysapybyi pimoewy zeka Sesus myzikisizoze iwaze ihyrikoso Deus bo piokyhyryk.

⁶ Ba ahape tu tynakaranaha — O katsaktsa mysapyrētsa — tsimaha. Ba zikaha. Hawa tsimyzurukunaha humo anahi wasanibara. Ahasapy-

byitsatu tsimykaranaha atsikara pwtowy waha my. Ipytowy tsikaeni zuba tiriko eze mytsakyky-nahaze atsikara nawerekbaik. Anawahi estuba maku ahatuk imysapybyita nikara iwaze ustsa kytsa ituk pisapybyikinaha.

⁷ Ahamysapybyitsatu tsikykaranaha ana hi tsi-moewynaha! Hawa Sudeutsa myikaha eze ipytowy ibky zipaparakbaiknaha zuba anawahi ahamysapybyity tsimykaranaha tsimoewybaiknaha. Ahamysapybyitsa tu tsikykaranaha tsip-imoewynaha zeka atsikara ipytowy ezytyk ziky waha tsimaha. Atsikara ipytowy byizeka my wasani tsimaha.

Tubabatu taparaktsa Sudeutsa Esito ekze niukurunahaze hozipyrykzatsa nisibakanahaze sispu ty tahatsuehe humo tsuku tsuku nikaranahaze hi wahoro ezektsa basibahuk. Hozipyrykza hi sisapyzeky iwaze zibezenaha nikaranahaze hi ba zikykbana. Anawahi Sesus mysapyzeky nihyrikosokdaze mysapybyitsatu tsikykaranaha humo Deus ihumo nimyokzohik. Sudeutsa tahamyikaha bo pororo ziknakaranaha. Ana bo hi taparaktsa mytsaty ziknakaranaha. Iwata Sesus mysapyzeky nihyrikosokda ibo mytsaty tynakaranahaktsa!

⁸ Sesus nihyrikosokda iwa humo hi katsa mywahi ba zikyrikosokda. Iwatsahi mysapybyi tsimoewybaiknaha! Atsikara ibky zipaparakbaiknaha waha. Wasani haty tuzurunahaktsa! Wasaniha ty zuba tynapamykysonahaktsa! Iwa tsimyzurukunaha zeka Sesus mysapyzeky nihyrikosokda na ha humo mytsaty tsimykaranaha. Sudeutsa

hozipyrykzatsa sisapyzeky ziknasibakanaha wa mytsaty ziknakaranaha katsa siwatsa tsimaha, Sesus mysapyzeky nihyrikosokda na ha humo mytsaty tsimykaranaha.

9 Botu ahabo simysapybyitsa soho iwatahaka. — Asaktsa ustsa okeza humo sisoho wabymybaranikitsa batu ahatuktsa zikaha. Kytsa nisipyrirykyknaha ba ahatukytsa zikaha — iky.

10-11 Kamyspirikpowy batu wabyziu. Iwatahakaze myzubaha bo simysapybyitsa nikaranaha sibo batu metutu tsimaha. Asaktsa Sesus humo batu sispirikpohuk situk tsimyzurukunaha. Situk tsimyzuruku nahabyizeka ikiahatsa zuba tuzurukunaha iwa tsimaha zeka batu ahamysapy. Ata hi:

— Utakta Sesus humo kaspirikporēta — my. Iwa ustsa okeza mysihuahua zeka tsisoho wabymybarēta. Ituk ba zikmydisahanaha. Wastuhu kytsa:

— O katsa Sesus tuktsa — mykaranaha simysapybyitsa mykaranaha. Simyspihikbatanikitsa. Siharerewabymybarētsa. Ustsa namy pebyk tsihikknaha. Deusbyita hyrikoso zuba siakparawy. Tsōsī mozikuikiknaha. Asaktsa ispehatsa harere bo batu h̄y zikaha. — Aty iwa mozuruku zeka Sesus humo ispirikpobyita iwatsahi batu ipe: “katsy” ahasopyk ituk ba zik mydisahanaha — my.

12-13 Kytsa Sesus humo batu sispirikpo utakta batu ispe my:

— O ikiahatsa batu ahamysapy tsimyzurunaha — my. Iwa batu tyso. Deus zuba ispe:

— O ikiahatsa batu ahamysapy tsimyzurunaha — my. Utakta batu. Atakta Sesus humo tispirkporēta imysapybyita tu mykara zeka ipe tsimaha:

- O ikia batu imysapy — tsimaha. Iwa tsimytsasonahaze wasani my tsimaha h̄y. Deus harere papeu humo ziwatahaka:
 - Ahatuk Sesus tuktsa imysapybyita tu mykara zeka nabo pāoty — ipe tsimaha.
- Iwa my.

6

Korītio ezektsa myharapepehaīkiknahaze asaktsa sispirikpobyitsa ba zikaha.

¹ Kyze ikiahatsa katukytsa tsimaha. Sesus humo ahaspirikporētsa iwatsahi Deus tuktsa tsimoziknaha. Hawa ha skaraba tsimyhara-pepehanahaze Sesus humo sispirikpobyitsa kytsaharerewabykytsitsa bo tsimaha. Ahasikpybyrētsaktsa kytsa! Ahasopyksapybyi h̄y! Kytsaharerewabykytsitsa ahatuktsa petu tsimaha. Asahi pahatsumuēhīkīnaha iwaze meky watu mytsaty tsimykaranaha, ikiahatsa tyharapepokzitsizonaha.

² Katsa Deus tyryktsa. Mybarawy mopykze iwaze katsa kytsaharerewabykytsa tsimoziknaha iwaze Kiristu tuk tsimytsasonaha mybarawy ezektsa pe tsimaha:

- Ikiahatsa Deus okzeka ahamysapyrētsa tsimoziknaha — tsimaha. Ustsa kytsa pe:
- Ikiahatsa Deus okzeka batu ahamysapy — tsimaha. Iwa tsimaha anahumo kok tsikspiriktsokdanaha. Iwaze ana bo mytsaty tsimykaranaha iwaze tsikahapepehaīkiknaha kok ahabetsakyhytsa ahahumo myharereziurētsa tsimozikzonaha.

3 Bijoikpe iknyktsa Deus tsumuēhītsitsa soho tsimytsasonaha. Wastuhutsa pe:

— O ikiahatsa Deus okzeka ahamysapyrētsa tsimaha. Ustsa pe:

O ikiahatsa Deus okzeka batu ahamysapy tsimaha — iwa tsimaha. Anasoho humo hi tsikspiriktsokdanaha. Iwaze bijoikpe iknyktsa bo mytsatyziu tsimykaranaha zeka abaka tsikahapepehañkikhaze ahapehawy wasani tsimaha.

4 Iwatsahi tsimyhapepehañkikhaha zeka ahaspirikpobyitsa tsimaha. Asaktsa Sesus humo sispirikporētsa maha siokzeka batu ahamysapy tu iwatsahi batu sibo tsimaha.

5 Ahasikpybyrētsa! Ikiahatsa ispirikpobyita bo zeka ahasikpybyrētsa! Ahatuk estuba zuba ipehawy wasani my. Tozeka ja sizubarētsa ispehawy wasani maha. Iwa h̄y iky. Sihyrinymyrētsa h̄y. Asahi tsimyhapepehañnikitsa soho mytsatyziu maha, ikiahatsa ahatukytsa tsimaha. Iwa tsihok-daharēna ja.

6 Iwatsa tu ahatukytsa sispirikpobyitsa bo nisoktyhyryknaha. Batu wasani tsimaha. Asahi sispirikpobyitsa batu siaku. Ahasopyksapybyri-huja kytsa!

7 Ahatukytsa ispirikpobyita bo tsipioky-hyknaha zeka wasani byitsa tsimykaranaha. Ikiahatsa sispirikpobyitsa watsa tsimaha. Sisprikpobyitsa ahatukytsa ahahumo mysapybyriknaha iwatsahi ikiahatsa Deus harere bo batu h̄y tsimaha. Sisprikpobyitsa ahanamy piaksenaha zeka kyzehu ziaksenaha.

Sispirkpobyitsa pahasapybyikinaha kyzehu zahasapybyikinaha.

⁸ Wastuhu ikiahatsa ahatukytsa namy tsiziakse-naha. Ikiahatsa hi ahatukytsa tsimysisapybyikinaha. Anahi ikiahatsa ba zikspirktsokdanaha.

⁹⁻¹⁰ Asaktsa simysapybyitsa tu zikzurukunaha batu Deus tyryktsa zikyziknaha. Asaktsa ustsa okeza mynasihuahuakanaha, ustsa kytса mynapewohiknaha deusbyita hyrikoso bo yh̄y mynakaranaha, sitsyhyryboanikitsa, sisopyksapybyitsa, mymyijaikiknahatsa, tahaopuwы tsōsī zikuikiknahatsa, ustsa namy ziaksenahatsa, ziwerskynahatsa iwa asaktsa Deus tyryktsa ba zikyziknaha. Iwa ba zikahapespihikbatanaha!

¹¹ Jatuba tu wastuhu ahatuk iwa zikzurukunaha abaka batu. Abaka Sesus Kiristu humo ahaspirikporētsa iwatsahi meky watu mytsaty tynakaranaha. Ahamysapybyity tsikykaranaha zeka Deus zahaokzohik. Deus zahawatawy ityryktsa tsimoziknaha iwaze iharere bo zuba hȳy tsimykaranaha! Sesus humo ahaspirikporētsa iwaze Deus ahasoho humo my:

— O asaktsa simysapyrētsa — my. Iwa mozik, ihyrikoso ahatuk mynapykyryk h̄y.

Hawa tsimykaranaha Deus okzeka wasani zuba tsimykaranaha.

¹² Tozeka ja estuba ahatukta kape my:

— Hawa mozihikik naha ty zuba mykara batu amy tohi kahumo byitatu zik — my. Amy ty motsasokonaha zeka wasapehe mykara. Nanabyi ba zik tsumuēhī iwatahi nawā mozihikik batu mykara. Nanabyi my zeka mozikykse.

¹³ Mydisahawy myworozik bo zuba my. Myworozikta mydisahawy suk zubata. Aiba mohyrikosokdanahaze myworozik eze ky mydisahawy mohokda. Iwa my. Mynuryta meky watu my. Ustsa okzeka ba ziksihuahua harape makutsa humo kino ba zikaha, Deus anawa bara humo nizukni. Deus nimysukni ihyrikoso mytuk mynapykyryk. Deus hyrikoso humo batu hŷ tsimahaze ihyrikoso batu mytuk mynapykyryk. Katsa Deus hyrikoso mytuk mynapykyryk zeka mysapyr̄tsa tsimoziknaha.

¹⁴ Sesus nihyrikosokda iwaze Deus zihyrizikpowy inury ispituzo. Iwata katsa tsimyhyrikosokdanahaze Deus mynamyhyrizikpowy iwaze mynury ispituzo. Izikwy humo tsinahyrizikponaha.

¹⁵ Sesus humo myspirikpor̄tsa zeka mynury Kiristu nury hokyk watsa tsimoziknaha. Simysapypybyiza asiza ba sipyririrykok. Kiristu nury hi mynury hokyk iwatsahi imysapypybitatsa bo zeka batu imysapy hŷ. Deus okzeka batu imysapy iwaze imysapypybitatsa bo ba ziktsuknaha.

¹⁶ Imysapypybitatsa bo piakse zeka estuba zuba wata tsimozik. Deus harere papeu humo ziwataha:

- Maku wytyk piakse zeka, astsatu moziknaha
- niy.

¹⁷ — Atakta Sesus tuk mynapykyryk iharere bo zuba hyŷ mykara zeka atakta ihyrikoso astsatu moziknaha — my.

¹⁸ — O kytsa usta oke bo ka hua hua byitaha. Wytykyryk usiza bariktsa bo kino hua hua byitaha. Iwa tsimaha zeka ahanury tsipisapybyiki-

naha. Ustsa ahamysapybyitsa ty tsikykaranaha, ahanury batu zikmyiw.

19 Anahumo hi ba zikspiriktsokdanaha! Mynury eze Deus hyrikoso mynapykyryk ikytahi Deus zuba mypehatsa my. Mypehabyitsa tu atahi zuba iakzohota my.

20 Deus humo mysapybyitsa tu tsikykaranaha Sesus humo mymyokzohik. Sesus Kiristu mysapyzeky nihyrikosokdaze Deus mysapybyi humo nimyokzohik. Iwatsahi isapyha tyzubatahaktsa kytса! Ihyrikoso humo ahapunihikrētsaktsa! Ahamysapyrētsaktsa iwaze kytса Sesus humo sispirikpobyitsa ahasopyk bo iksa mahaze:

“O Deus zuba imysapyrēnikita” – maha.

7

Tsipahasukzanaha zeka hawa tsimykaranaha.

1 Iwaze ana papeu humo kabotu tsiwata-hakanaha.

— O katsa mysukza byizeka ja wasani tsimaha — tsikykaranaha. Yhў my.

2 — Ahahyrinymyrētsa. Sizubarētsa wytykyryk bo taokezabyiza bo mynakaranaha. Siokezaby-itsa tu wytykyryk myspyririyikiknaha. Kytса simyitsihikrētsa iwatsahi estuba zuba ioke babatatsa zeka wasani my. Wytykyryk kino ni-watihi tahapytsa tuk zuba mynapykyknaha zeka wasani my. Iwa usiza pytsa ba ziksihuahua. Iwa simysapybyi batu zikaha.

3 Kytса taokeza mysiakzanaha zeka atatsa yhў my zeka wasani my. Wytykyryk tabariktsa mysi-akzanaha zeka atahi yhў my zeka wasani mykara.

4 Wytykyryk ikiahaka ahapytsa tuk myzahapyrirykyknaha zeka hyŷ tsimaha. Kytsa niwatihi tahaokeza mysipyriry tsihiknaha zeka hyŷ taha! Iwaze tuze ziksipyrriryknaha byizeka atatsa humo hyŷ tsimaha – my.

5 Isukzata taoke pe my zeka:

— Aba ahanury tuk ka bazapyriryk! Tapara Deus bo zuba tsimypamykysonaha — tsimaha. Iwa tsimaha zeka wasani my. Atakta taoke tuk yhŷ maha zeka wasani tsimaha. Deus bo tsimypamykysobanahaze aoke tsipipyrirykzo! Iwa ahabyi zeka Satanas wytyk pe: Usta tsioktyryk! Kyze maku pe:

— Ustatsa tsipyriryk! — my. — Iwa anaharere bo ba wabytaha iwatsahi tyharape pyririryknahatsa! — my.

6 Kaharere ba mykzohowybara tu. Hawa kaokzeka tisapyrēna ty zuba mykara.

7 Utakta kasukzahukbyita. Kaokzeka ikiahatsa ahasukzabyitsa my tisapyrēna my. Asukzahukbyita zeka Deus patsumuēhī wasani tsimyzuruku. Ustakta batu. Atakta isukzabyita zeka tsihokdaharēna. Wytykyryk mysipyriry zeka imysappybyita mykara. Iwatahi Deus ata pe my:

— Tsikasukzakta! Niwahi mozihikik — my. Iwa my.

8 Sisukzabyitsa haramukukaka pe my:

— Ahasukzabyitsa tsimyzurukunaha zeka wasani! Uta tyzikwatukunahaktsa! — my.

9 Ahasukzabyize tsihokdarēna zeka tsikahasukzazonahaktsa! Deus okze wytykyryk tsimysipyriryk tsihiknaha zeka batu

ahamysapy my. Iwa zeka tsipasukza zeka wasani my.

¹⁰⁻¹¹ Aba sisukzakatsa bo mopamykysoko. Deus harere ty ispe my:

— Kytsa ahaokeza ty ka moewy moewy byitaha! Wytykyryk kino niwatihi ahapytsa ty moewy moewy byitaha! Tabarikta moewy zeka usta maku ba ziaksezo my. Apyitsabyitatsa tsimyzuruku. Maku bo batu h̄y tsimy. Abarikta bo tsimyziksizo zeka tisapyrēna h̄y — my.

¹² Abaka kamypehawy ty zuba ahape my. Sesus ta anaharere humo batu tyso. Asaktsa Sesus harere bo hȳy tsimykaranaha iwatsahi ihumo ahaspirikporētsa my. — O katukytsa wastuhu ahatuk Sesus humo sispirikpobyiza humo botu tahasukzanaha. Atatsa atuk mynapykyryk zeka batu tyso nabo pāoty ba zikaha ity arek arek byitaha! — my.

¹³ — Wytykyryk kino niwatihi! Wastuhu ahatuk Sesus humo sispirikpobyitsa botu zahaoktyhyryknaha. Abarikta atuk mynapykyryk zeka ity arek arek byitaha! — my.

¹⁴ Ahabariktsa Sesus humo sispirikpobyitsa tu isty arek ahabyi zeka Deus ahahumo mysisapywyky. Ahatuk mopykyryknaha humo Deus mysisapywyky. Iwata Sesus sispirikpobyiza tuze tahabariktsa tuk mopykyryknaha iwaze Deus ahahumo mysisapywyky. Iwa byizeka ahahyrytsa sispirikpobyitsa hyrytsa watsa. Batu ba. Ahahyrytsa niwatihi Deus hi mysisapywyky Sesus humo ahaspirikpobyitsa tu tsimypykyryknaha humo mysisapywyky h̄y.

¹⁵ Deus wytykyryk pe niy:

— Ahapysa harere bo yh̄y tahaktsa! — my. Kyze katsa mype:

— Ahaokeza harere bo yh̄y tahaktsa! Harape ty betsak betsak byitahaktsa! — my. Iwatahi Sesus humo ispirikpobyita ikia tuk zikapyk tsihikik byizeka yh̄y tsimy. Îhyrity watatsa ispirikpobyitatsa ikia tuk zikapyk tsihikik byizeka atatsa pe yh̄y tsimy. Metutu tsimaha.

¹⁶ Iwatahi ahape my:

— O katukytsa ahaokeza tuk typykyknahaktsa! Tozeka ja ahahumo Sesus harere bo hȳy maha iwazahi ihumo sispirikporēza moziknaha. O katukykyryk ahabariktsa tuk typykyknahaktsa. Tozeka ja ahahumo Sesus harere bo hȳy maha iwatsahi ihumo sispirikporētsa moziknaha

Deus harere bo hȳy tsimynakaranaha.

¹⁷ — Deus hyrikoso mytuk mynapykyrykze hawa skaraba tsimaha izikwy humo tsahasopykziurētsaktsa! Deus zahawatawy zeka tarabaja tsimykaranaha. Ana humo kino tarabajaziu tykaranahaktsa! Mekywatu tarabajabyitahaktsa! Ana hi Deus mozihikik. Anaka mypehawy Sesus humo sispirikpotsa bo mykara.

¹⁸ Deus maku piakzykyhyta piwatawy zeka ipiak humo Sudeutsa iwatawy humo batu ipikts̄h̄i. Iwa Deus ipiakzykyhybyita piwatawy zeka atakta batu ipiakzykyhy! — my.

¹⁹ Deus batu mype aha:

— Tsikahapiakzyknahaktsa — ana humo batu tyso. Atahi mype niy:

— Kaharere bo hyŷ tynakaranaha! — iwa hi motsaso.

²⁰ Deus zahawatawyze tarabaja tsimaha. Ana tarabaja kino tsimykaranaha.

²¹ Deus zahawatawyze tarabajaziu tykaranaha batu okyrysaro humo ka. Ana soho humo hi mytsaty mytsaty byitaha! Apehakatsa tsinamyrēta itsyhyryze tarabajaziu tsimahakta! Apehakatsa tsinamyrēta ape tsiksita my zeka wasani tsimoparak iwaze tarabaja okyrysaro humo tsimaha.

²² Iwatatuze kytsa ispehatsa tsinamyrēta tsyhyryze tarabajaziu my batu okyrysaroko tsinamyrēta harere bo zuba hyŷ mykaranaha. Wasani my. Deus bo nisiwatawyze iharere bo zuba hyŷ mykaranaha iwa sakurētsa babatsa batu tahapetu sisopyk maha. Kytsa assaktsa tahaharere humo zuba hyŷ mykaranaha. Deus nisiwatawyze iharere bo zuba hyŷ mykaranaha iwatsahi Deus mozihikik naha ty zuba mykaranaha.

²³ Deus hi botu ahahuak ty ahahumo nyny niy. Iwatsahi atahi zuba ahapehakatsa mozik. Iwa kytsa ahapehakatsa mozihikiknaha batu hŷ tsimahaktsa!

²⁴ O katukytsa Deus zahawatawyze tarabaja tsimaha. Ana humo kino tarabaja tahaktsa! Iwa tsimyzurukunaha.

Sipyitsabyiza, sisukzabyitsa ahatsa soho humo mymymyrikpoko.

²⁵ Kyze apapeu humo kabo botu tsiwata-hakanaha kape tsikaha:

— Asaktsa sisukzabyitsa sipyitsabyiza kino ni-watihi hawa mypehawy sibo tsimaha — tsikaha. Ana ty hi Deus kabo batu tyso. Kaharere zuba

ahabo motsaso. Deus kahumo tsimypokzitsiarēta ana humo kino ahaspiriktsokda byihuja! Ata humo hi wasani kahyrinymyrēta. Uta Deus harere bo pykyhytu hyň mykara iwaze kapehawy humo yhň tsimaha, kapehawy wasani my.

²⁶ Asaktsa Sesus harere bo batu hÿ zikaha sisukyrytsitsa tu mymymsininiwykynaha. Ana humo hi sisukzabyitsa wasani maha.

²⁷ Botu tsikasukza zeka ahaokezaty isty moewy moewy byitaha! Ahasukza byizeka ahawahi tyzurukunaha! Ana kino tisapyrëna.

²⁸ Tsipasukza zeka batu imysapybara ty tsimy. Iypykyhyzytyktatsa aty piokthyryk zeka batu imysapybara ty my. Abaka mysukyrytsitsa pokso batu sisukza iwatsahi batu paikpa mytsaty tsimaha. Tsipasukza zeka aoke soho bo zuba mytsaty mytsaty tsimy. Ahasuk bo, ahadisahawy bo, ahahyrytsa bo iwaha bo mytsaty tsimykaranaaha. Ahasukza byizeka ba paikpa mytsaty zikaha anahi mozihikik iwatahi kapehawy ahabo my.

²⁹ Katukytsa aibani zuba Kiristu myzikisizo. Niwazuba mybarawy mopykze mohokda. Iwatsahi asaktsa sisukzatsa sisukzabyitsa watsa tsimyzurukunaha ahamytsaty mytsaty bijataha!

³⁰ Asaktsa sisukatsihikrëtsaze sakurëtsa moziknaha. Asaktsa siyidikrëtsa batu siakubyitsa. Asaktsa sinamy zuba ziaksekenaha sinamybyitsa watsa mozurukunaha.

³¹ Asaktsa okyrysaro bo zuba paikpa mytsaty mynakaranaha okyrysaro humo mytsaty mytsaty byitaha. Mybarawy mopykze okyrysaro mohokze. Mybarawy eze ka mohokdaba iwatsahi

ahanamy bo ahamytsaty mytsaty byihuja! Deus soho bo zuba mytsaty tynakaranahaktsa!

32 Utakta ahahumo mozihikik ahanamy humo ka mytsaty mytsaty byitaha! Atakta batu isukza Deus soho bo zuba mytsaty mynakara. Atahi:

— Hawa sa my. Deus humo tsakurēta my hawa sa my — mynakara. Iwa mytsaty mynakara.

33-34 Isukzata hi:

— Tanamy tsizubarēna bo zuba mytsaty mykara iwaze kaoke tsakurētsa mozik mynakara nahumo hi mozihikik — ana bo mytsaty mynakara. Paikpa mytsaty mykara, Deus harere mozihikik ioke niwatihi tsiydikrētsa mozihikik. Tsihokdaharēna. Iwatatsa ipykyhyzytyktatsa haramukukaka kino niwatihi Deus bo zuba maha. Ihumo sitsyhyryrēza. Azahi:

— Hawa sa tsimaha. Deus tsakurēta my hawa sa tsimaha — mykaranaha. Iwa mytsaty mykaranaha. Atatsa ipyitsakatatsa tapyta soho bo mytsaty mykara. Tsakurēta mozihikik. Tadisahawy soho humo. Tahanamy soho humo kino niwatihi mytsaty mykara.

35 Ana kino motsaso pahatsumuēhī. Batu tyso:

— Ahasukzabyitsaktsa! Iwaze ahahumo tsihokdaharēna zeka batu ahatysukza zikaha! — ana humo hi batu tyso. Deus bo zuba tsimaha, iharere bo zuba pykyhyty hyŷ tsimykaranaha iokzeka wasani tsimyzurukunahaktsa! Tsizubarēna soho humo mytsaty mytsaty byitahaktsa!

36 Maku isukza byita zeka tapetu isopyk zeka — Kaharerewabyhy humo kamypokztsiarēta my zeka taharerewabyhy piakse — my. Wasani my.

Atatsa mozihikik zeka pisukzawy. Tsipasukza zeka wasani mykaranaha.

37 Usta maku isukza byita zeka tapetu isopyk:

— Utakta Deus bo zuba mozuruku iwatahi batu kasukza tsihik uta zuba mozuruku — my. Iwa mytsaty my zeka ba ziktasukza. Iypykyhyzytyktatsa bo amo ahabyi zeka wytykyryk batu mysihuahua iwaze ba ziktasukza. Wasani my.

38 Iwatsahi atakta iypykyhyzytyktatsa piakse zeka wasani my. Atakta iypykyhyzytyktatsa ba ziakse wasani. Ana kino tisapyrēna.

39 Abaka wytykyryk pe my:

— Abarikta atatu zeka ituk awahi tsimy-napykyryk. Ba zerek. Abarikta mohyrikosokdaze zuba mektatu tsipiakse. Ikia usta maku tsimyzihikik zeka wasani tsimykara, usta maku tsipiakse zeka wasani tsimykara. Sesus humo ispirikpota zuba tsipiakse.

40 Haramukukaka tahawahi mypytsabyinaha zeka siakurēza moziknaha. Deus bo zuba mytsaty mykaranaha. Kaokzeka atatsa zuba mopykyryk zeka tsakurētatsa. Imysapyrēnikitatsa. Deus hyrikoso katuk mynapykyryk. Iwatahi kaharere tsiwabytoktonahaktsa kytsa! — my.

8

Mydisahawy deusbyita suknihī bo nyny ziknakaranaha hawa sa tsimykaranaha.

1 Aba apapeu humo kabo botu tsikziwata-hakanaha kape:

— Mydisahawy deusbyita hyrikoso suknihita bo zikzinykylnaha bykyze tsipiboronaha zeka

wasani ja tsimykaranaha – tsikaha. Aba uta ahape my. Ikiahatsa tsikykaranaha:

— Katsaktsa tsinymyrybanaha – tsikaha. Yhŷ my tsinymyrynah. Amy ty abazuba tyharape-hapokzitsikinaha ana hi wasani. Ikiahatsa hi my:

— Katsaktsa myhyrinymyrētsa ikiahatsa batu ahahyrinymyry iwa tsimaha zeka ustsbo mysiakubyriwyky. Ahasopyksapybyrihu ja. Tyharape hapokzitsikinaha zeka ustsbo tysiakuwykynaha. Iwatsahi tyharape hapokzitsikinaha – tsikaha.

² Wastuhu ahatuktsa:

— Katsaktsa tsinymyrybanaha. Myhyrinymyrētsa hŷ – tsikaha. Deus okzeka batu. Ahape tu tsimynakaranaha humo iwaze batu ahahyrinymyry tsimaha.

³ Katsa Deus humo mymypokzitsirētsa zeka Deus mymyny. Atahi myhumo tsimypokzitsiukrēta, katsa ituk kytsa tsimoziknaha hŷ. Ana humo hi tsihyrinymyrētsa katsa batu.

⁴ Abaka mydisahawy deusbyita hyrikoso suknihi bo zuba zikzinynykynaha ana soho hi motsaso. Deusbyitakta mahani awatutatu Deus babata ta estuba zubata, ana humo hi myhyrinymyrētsa.

⁵ Mybarawy ezecktsa okzeka:

— O deustsabyitsa humo astsatu tsa watsa Deustsabyitsa sasabyitsa byrisoiktsa watsa. Deustsabyitsa sasabyitsa hwitsa watsa. Iwatsatu – mytsaty ahabyitsatu mykaranaha.

⁶ Katsaktsa Sesus tuktsa Deus estuba zubata tsimaha. Ana humo hi myhyrinymyrētsa hŷ.

Atapehe myzo tsimykaranaha. Ihumo tsimyzurukunaha. Atahi mybarawy nizukni. Sesus Kiristu mypehakatsa harere humo Deus mybarawy nizukni, ihumo hi tsimyzurukunaha. Iwa hŷ.

⁷ Wastuhu hani zuba Sesus humo sispirikporētsa tahasopyk humo deusbyitsa sispiitu maha iwa ziknakaranaha. Iwatsahi mydisahawy deusbyita hyrikoso suknihita bo nyny ziknakaranaha zeka deusbyita disahawy maha. Mytsaty ahabyitsa tu mykaranaha. Iwatsahi ba ziktahadisanaha. Abaka iwa mytsaty mykaranaha, deusbyita mahani ana humo kino batu sihyrinymyry iwaze ana sidisahawy pihauknaha zeka batu siaku moziknaha.

⁸ Deus mymysapywyky. Batu mydisahawy humo zuba zikmysapywyky. Mydisahawy ty tsipahadisahanahaze kino iokzeka wasani, mydisahawy ty haukbyize kino iokzeka wasani atsatu. Iokzeka batu mydisahawy humo mysapyrētsa tsi-moziknaha.

⁹ Ahatukytsa humo pykyhytu tahaktsa kytса! Asahi Sesus humo tsikaeni zuba sispirikpotса hi:

— O deusbyita hyrikoso suknihita disahawy humo ka batu hauk zikaha, ana sidisahawy ty hauk zeka batu wasani my — maha. Iwatsahi iki-ahatsa siokzeka batu sidisahawy ty hauk zikaha. Tsipiboronaha zeka mysimiwynaha iwa ahasopyksapybyi tsimaha.

¹⁰ Ikiahatsa hi:

— O katsa deusbyita wahoro bo zeka ana mydisahawy deusbyita bo nyny nikaranaha ana ty

hi mymydisahanahaktsa! Deusbyita hyrikoso mahnī iwatsahi tsipiboronaha. Iwaze atakta Sesus Kiristu humo tsikaeni zuba tispirikporēta ahabo iksa myze atahi:

“Uta niwatihi ana disahawy pihauk zeka wasani my” – my. Atakta batu, ihumo batu wasani my. Deusbyita hyrikoso zoknihita disahawy babaha mytsaty myze ihumo batu wasani pihauk. Ihumo deusbyita isopyk.

¹¹ Atahi zasopykduku iakubyita mozik. Tozeka ja tapetu mykara:

— Aba mohyrikosokda. Kamysapybyita ikykara anahumo hi mohyrikosokda tawata – my. Atakta Sesus humo tsikaeni zuba ispirikpo. Sesus isapyzeky nihyrikosokda ahaspiriktsokdabyihu ja. Atakta ahamysapybyi humo batu iaku.

¹² Iokzeka ba hauk zikaha. Ahatuky humo ja ahasopyksapyhu. Tsipihauk naha zeka Kiristu okzeka batu isapy tsimaha. Ahamysapybyitsa tu tsimykaranaha.

¹³ Iwaze uta katuky humo kamypokztsiarēta. Katuky pe:

— Deusbyita hyrikoso suknihita disahawy pihauk zeka batu wasani my. Uta niwatihi ba ziborozo h̄. Ana sidisahawy ty hauk byizeka iwaze katuky tsakurēta. Ana sidisahawy pihauk zeka katuky pimiywyky ana kino batu imysapy. Iwatsatu ahatukytsa humo ahamypokztsiuhu, batu simysapybyiwy sibo ahasopyksapybyrihu ja! – my.

1 Kiristu humo tisapyrēna bo zuba ma iky, iwa mozihikik iwa mozuruku wasani my. Hawa mozihikik zeka katukytsa mysimyiwyky zeka iwa utakta batu kasopyk, katukytsa humo. Utakta Deus humo kakzohota wasania tymotsasoko. Tapara Sesus kapehatsa iny. Ikiahatsa Sesus Kiristu humo ahaspirikporētsa, Deus soho ty ababo iktsaso anahumo hi ahaspirikporētsa tsimoziknaha. Deus harere wasaniha tsiwabynahaze kaharere bo hȳ tsikykaranaha. Iwatahi Deus ykzoho babata ahahyrinymyrētsa.

2 Ustsa kytsa:

— O Pauro Deus zipehata ja. Deus sohokotsa ja. Deus watawyhy ja — maha. Ikiahatsa hi:

— O Pauro Deus wasaniha humo iakzohota. Atahi Deus zipehata my ana humo kino myhyrinymyrētsa. Katsa iharere humo Sesus humo myspirikporētsa — tsimaha.

3 Wastuhu kytsa kasoho humo siharerewabymybarētsa. Uta kaharere humo harapubetehe mykara. Kasoho humo hi:

— Uta Deus wasaniha humo kakzohota atahi zikpeha — my.

4 Iwa ispe my:

Deus wasania ty motsasokoze kytsa mydisahawy ty mypuwy ty iwa kabo nyny my zeka wasani mykaranaha. Katarabaja huak humo. Wasani h̄y.

5 Ustsa Deus ykzohotsa tahaokeza tuk mynakurunaha asiza hi Sesus humo sispirikporētsa. Deus okzeka tisapyrēna. Mypehakatsa itukytsa tahaokeza tuk mynakurunaha, Peduru niwatihi

taoke tuk ziknaukuru. Utakta batu, Deus hyrizikt-sokzawy humo mykaratahi batu piksukza tsihik.

6 Ahaokzeka uta, Baranabe ahatsa katsa tu my-disahawy huak tarabaja tsimynakaranaha. Ustsa Deus wasaniha humo sakzohotsa ana humo hi zuba mykaranaha, usa humo batu sihyrizikt-sokzawy. Uta zuba kadisahawy huak bete my-parik iwowoko.

7 Ikiahatsa botu ahahyrinymyrētsa sodadutsa mowatsorokonaha zeka sihuak ty nyny nikaranaha. Usa tarabaja nikaranaha humo batu. Aty waratok buruk mysiparik zeka asatyhi tadirahakanaha. Usa tarabaja mykara humo batu. Aty hozipyrykzatsa peryktsa sitsotsiktsa ytsik pikukuru. Usa tarabaja mykara humo batu. Batu aty tohi usa tarabaja mykara, amy ty tarabaja mykara ana humo kino ihuak ty nyny my.

8 Katsa niwatsa hi Deus wasania ty motsason-ahaze myhuak ty nyny tahaktsa. Hana wa sa mydisahawy ty nyny tsimaha. Iwa kytsa sopyk humo tsimykaranaha. Deus harere Moises bo nitsasoko naha kino atsatu my.

9 Tapara Moises sopyk humo ka:

— Pikuza tirikotsa mysipyryk pyryk zeka kyze zitadisaha — tsimy iwa. Ana harere pikuzatsa bo zuba bara. Deus pikuza humo tsimypokzitsiarēta.

10 Ana kino ziwatahaze mysoho niwatihi atahi sizubarētsa humo tsimypokzitsiukrēta. Iwaze aty mysiparik zeka:

— Aibani zuba idisahawytса muanaha — mykara. Aty tirikotsa mysizyzyk zeka:

— Iwaze zuba idisahawytса mokymynaha — mytsaty mykara. Wasani my.

11 Deus wasania ty ababo iksasoko. Tatsuhuk bo ziparikik tawata. Aibani tadiolahawytса nisidy-dykykze isty tadiolahakanaha. Katsa kino niwatihi siwatsa ahanamy tsipiaksenaha zeka tarabaja huak ty iwaze tsimydisahakanaha. Iwa wasani my. Katsaktsa ahapokso batu mypyby.

12 Ustsa Deus wasaniha ababo motsasokonahaze ahanamy ty sibo nyny tsikaha. Katsaktsa ahanamy mybo tsikzapykykynaha zeka wasani my. Batu ba tsikaha.

Deus wasania ty motsasokoze kytsa Sesus humo sispirikpobyitsa tozeka ja:

— O Deus wasaniha batu mywabyhy. Pauro Deus wasaniha motsasoko okyrysaro humo. Okyrysaro waka zuba mozihikik hÿ — mybarapetu mykaranaha. Iwa nitsasokonaha zeka kasikpybyrëta batu pahatsumuëhñ. Sesus humo ahaspirikporëtsa iwatahi meky humo tu tarabaja ikykara, kadiolahawy huak humo iwaze pidisha.

13 Tsikspiriktsokdanaha asaktsa Deus wahoro zubata eze tarabaja ziknakaranaha sidisahawy ty kytsa sibo nyny nikaranaha. Asaktsa Deus wahoro zubata bo inapupunahatsa siraratsa nisibykyryknaha. Iwaze Deus wahoro zubata eze ziknapamykysonahatsa ziknasibakanahaze sizo-hotsa niyziknaha. Deus wahoro zubata eze ziknapamykysokonahatsa asaktsa disahawy zikaksenaha, ana sidisahawy tsapukte buruk zuktsa ziknakaranaha tsapukte buruk kyka Deus bo zikziwezokonaha usa tsapukte buruk kyka zikziborokonaha.

14 Iwata kapehatsa Sesus kape niy:

— Asaktsa wasania ty motsasokonaha anahuak humo sibo nyny tsimaha — niy.

¹⁵ Tapara utakta Deus wasaniha humo okyrysaro ty ba kabo nyny tsikaha, anahi mozihikik. Batu ahabo piwatahaka okyrysaro ty kabo nyny mykara tarabaja huak ty. Batu ba, kaokzeka mohyrikosokda zeka ana humo kino yhŷ my. Utakta okyrysaro ikiahatsa bo batu myzapyky na wata tu mohyrikosokda iwatahi batu aty tohi kasoho:

— Pauro okyrysaro zuba iakparawy — mytsaty ahabyi tatu mykara. Iwa batu tyso. Kahyrizikt-sokzawy Deus wasaniha motsasoikik ana humo hi kytса okyrysaro kabo ba nyny zikaha iwa mozi-hikik.

¹⁶ — Deus hi zikwatawy ana humo hi zikpeha iwaze wasania ty tyso byizeka batu kaku. Ba “Uta zuba Deus wasania ty motsasoko ziky” batu kasopyk. Wasaniha ty tyso byizeka Deus isapyrēnikia ty kabo nyny habyi zeka kasukatsihikrēta mozik.

¹⁷ Uta hi tarabaja mozihikik zeka kytса okyrysaro ty kabo nyny maha zeka wasani my, Deus hiba zikpeha iwatahi sitsumuēhītsa ikyzik. Deus kape niy:

“Wasaniha ty kytса sizubarētsa bo tytsasokota!” niy. Iharere humo zuba hyŷ mykara.

¹⁸ Iwaze sa amy tarabaja maha humo myzihuak. Okyrysaro humo tarabaja humo myze batu kakparawy. Pikwabykynahatsa batu sibo tyso. “Okyrysaro ty kabo nyny taha!” my. Iwa batu kasopyk. Deus harere ahabo motsasoko zeka kakurēta mozik. Kakurēta zeka ana hi kahuak waha my — iwa hyŷ.

19 Utakta amy ty isapyha bo zuba ma mynakara. Mybarawy ezektsa ba kape zikaha:

— O Deus harere tynatsasokokta! — ba zikaha. Uta kapetu kasopyk:

— O Deus wasaniha motsasoikik na ha humo hi mozihiikik. Deus harere humo zuba hyŷ mynakara — my. Iwatahi Deus wasaniha motsasoikik tarabajaziu mykara, iwaze kahumo kytса sizubarëtsa Sesus Kiristu soho humo ziwabynaha ihumo sispirikporëtsa niyziknaha.

20 Sudeutsa tuk ziknapykyryk zeka sisopyk bo yhŷ ziknakara. Moises harere bo yhŷ ziknakara iwaze Sudeutsa kaharere humo Sesus soho bo hyŷ mykaranaha. Uta situkze Sudeu wata ikyzik iwaze asahi kaharere ziwabykynahatsaktsa Deus wasania ty Sesus soho humo hyŷ mykaranaha. Iwa sitsyhyryze mynakara.

21 Anawahi Sudeutsabyitsa tuk ziknapykyryk zeka Moises sopyk bo batu hŷ ziknakara. Iwatatu kaharere humo Sesus Kiristu harere humo mospirikpokonaha. Kiristu harere humo zuba hyŷ mynakara. Iwatahi Deus kapehatsa bo hyŷ mynakara.

22 Kytса asahi Sesus humo tsikaeni zuba sispirikporëtsa situk ziknapykyryk zeka sisopyk bo yhŷ mykara, iwatatu mysitsumuēh̄i. Sesus Kiristu humo sispirikporëtsa moziknaha ana humo hi mysitsumuēh̄i tsihikik. Kaharere humo sipunihikrëtsa moziknaha. Kaotutsa pauktsitsa tuk ziknapykyryk zeka sisopyk bo yhŷ ziknakara iwaze mysitsumuēh̄i simysapyrëtsa moziknaha iwatahi iwa mozuruku.

23 Iwa mozuruku zeka Kiristu harere piwabyz-iunaha. Deus wasaniha motsasokoze Deus myzi-wabykynahatsa bo ka mysisapywy. Kahumo ni-watihi mysisapywyky.

24 Kytsa mopaparakanañahaze estuba pomota ata humo hi siharaze tapara kytsa itsorik okyrysaro ty iharek humo pu niah, Ikiahatsa asa watsa tsimoziknaha. Sesus Kiristu harere bo hyŷ tsimykaranaha iwaze Sesus ahape my:

— Wasani tsikykaranaha — my. Iwa ahape myze ahakurētsa tsimaha. Ahakurētsa tsimoziknaha siharaze zumuta wata ikiahatsa ahakurētsa tsimoziknaha.

25 Kytsa mopaparaknaknahaktsa iwaze sipaikrētsa moziknaha. Myzibyituhukunaha tu simysapybyikitsa myserekenna. Iwa sipaikrētsa moziknaha. Iwa sisopyk maha itsorik okyrysaro zuba nazihikiknaha. Iwa zeka okyrysaro hi itsorik moryryba. Sesus Kiristu harere bo hyŷ tsimykaranaha zeka mywahi ituk tsinapykyryknaha.

26 Atakta siharaze tapara zumuta atahi buruhuwa niparakta. Ba tasukpe bo iksa ahabyita nipaparaka ity paranikita buruhuwa iparak. Atawatahi Sesus Kiristu harere bo pykyhytu hyŷ mykara iwa wasani mozuruku.

Asaktsa myharape huzizunahaze estuba wytyk bo mynarahaze iwatahi usta irahabyita ipaikanikita niyzik. Atawatahi kapunihikrēta my Deus harere bo hyŷ mykara.

27 Kytsa myzuba pe mykara:

— Sesus Kiristu harere bo hyŷ tahaktsa kytsa!
— mynakara. Iwaze kasopyksapybyita my zeka

kasikpybyrēta myzik. Iwaze isapybara bo mytsaty mykaraze kapetu kasopyk awatu ty my iwa kasopyksapybyi pimoewy. Iwa my zeka Sesus batu kape my:

— O ikia batu amysapy, kaokzeka batu amysapy tsimy — iwa zeka niwazuba! Sesus sopyk zuba mynakara hŷ. Ikiahatsa niwatihiktsa!

10

Deusbyita hyrikosotsa sisuknihitsa tyka areketahaktsa.

¹ Abaka katukytsa taparaktsa mydiritsa soho bo mytsatytahaktsa! Asaktsa isapy bara ty zuba ziknakaranaha. Asaktsa jerukbara eze bijo satata humo siske ziwatawy. Satata hapik niukurunaha. Deus bijo satata sibo zipeha iwaha hi siske ziwatawyky. Iwaze Deus pihik tsikpukte buruk ziske niy. Iwatsahi koikny zitsikzanaha. Buburu zuba pihik tsikyriritsa inarokota.

² Kytsa taparaktsa mydiritsa bijo satata bo iktsa niahaze Moises harere bo hyŷ nikaranaha. Buburu zuba koikny zitsikzanahaze Moises harere bo hyŷ nikaranaha. Iwatsa katsa Sesus humo nimyharasusunahaze katsa tihi:

— O Sesus harere bo zuba hyŷ tsimykaranaha — tsimahma.

³ Taparaktsa mydiritsa jerukbara buruk atsikara waha ty tahadisahakanaha. Deus atsikara waha nisisakihikyky bijoikpe iknyky kytsa bo inatsoko ana ty hi kytsa tahadisahakanaha mana inarokoha niy.

⁴ Jerukbara eze pihik zikukunaha. Kiristu hi pihik ty sibo nyny niy. Moises harahare

humo bay bay niyze pihik atsoko natakahā. Kiristu zikwy humo harahare ikny pihik inasoko izikwy hi situk niukuru. Iwatahi Kiristu soho ty mopamykysokoze – ata harahare wata hi mytuk mozuruku – Kiristu situk mynapykyryk anawahi nitsasokonaha.

⁵ Asaktsa Deus bo ba ziksakibazikiknaha. — O Deus ikia zuba wasanikita – my. Iwa batu zikaha. Asaktsa Deus pe:

— O katsaktsa Moises harere bo tsimyzihikiknaha — nikaranaha. Kyze iharere bo batu hŷ niaha. Iwaze Deus sihumo batu iaku iwaze sizubarētsa niakbakanaha. Sipoiktsa zuba jerukbara eze nitarenaha. Katsa kino niwatihi tsimaha zeka:

— O Sesus harere bo zuba hyŷ — tsimaha, iharere bo zuba hyŷ tahaktsa.

⁶ Hawa nikaranaha ana hi Deus namysukpeheke. Ana humo hi tsinymyrynahaktsa! Simysapybyitsa tu nikaranaha anahi nizihikiknaha. Katsa siwabyitsa tsimyzurukunaha.

⁷ Kyze Deus harere babata bo batu hŷ nikaranaha. Hawa ha nizuknikinaha ana hi Deusbyita hyrikoso siakparawy. Siokeryk dyhy dyhy nikaranaha. Siokeryk tumy zikukunaha iwaze ispe nikaranaha:

— Katsa ahahumo myspirikporētsa tsimaha — mytsaty ahabyitsa nikaranaha. Deus harere pa-peu humo ziwatahaka:

— Deusbyita hyrikoso okeryk dyhy dyhy nikaranaha. Tamzikahakanaha. Deusbyita hyrikoso okeryk nikarikinaha — niy. Katsa Deusbyita hyrikoso humo mysopyksapybyritsa ty tsikykaranaha.

8 Asaktsa ustsa okeza ziknasiakzaikiknaha. Tahawaky wytykyryk bariktsa humo sisopyksapybyiza ziknakaranaha. Iwatsahi asta okoroze tu sizubarētsa, 23.000 miutsa ahatsa niakbakanaha tahasopyksapybyi humo. Katsaktsa ba asawa zikaha!

9 Asaktsa sisakimyijarētsa ziknakaranaha. Asahi:

— Moises harere bo yhŷ habyi zeka Deus ba zikmysininiwy iwaze hi myhumo tsimypokzitsiarēta — mybarapetu nikaranaha. Iwaze imysapybara ty nikaranaha. Iwatahi Deus pyryhyktsa sibo nisiakzo, iwatsahi sizubarētsa nisibakanaha. Katsaktsa mysopyksapyrētsa tsimykaranaha! Sesus harere humo zuba hyŷ tsimykaranaha.

10 Sisakimyijanikitsa Deus zimyijaikiknaha. Iwatahi Deus sihumo taokaniki. Bijoikpe iknykta tatsumuēh̄itsa sibo ziakzohik. Deus harere humo niakbakanaha. Katsa asa watsa byitsa mosopysapybyri humo ba tsimaha!

11 Ana wahi mysukpehewy niy. Ana kino taparaktsa mydiritsa bo Deus harere nisihyrinymyry. Ana kino Deus harere papeu humo ziwatahaka hawa nisisininiwyky simysapybyitsa humo nisisininiwyky. Katsa anapapeu humo tsinymyrynahaze Deus pehawy tsiwabynahaktsa! Tapara mydiritsa zikzurukunahawa byitaha. Aibani zuba mybarawy mopykba. Iwatsahi siwaba ahasopyk!

12 Amata my zeka:

— O utakta kapunihikrēta — my zeka. Pykyhytutykta! Atakta tapetu isopyk:

— O Deus tsipiktsumuēhīkta iwaze batu kasapybyita tu mykara — my. Iwa my.

13 Satanas hyrikoso sapybara pehatsa ahamysapybyity tynakaranahaktsa ahahi mozihikik. Myzubaha bo mykara. Pahamyiwytihikik na ha hi mozihikik. Deus ahahumo ba zikspiriktsokda. Mymytsumuēhīkī botu nimywatawy iwaze taharere ty mybo yh̄y my. Deus hi ababo iksa mynakara. Mypunihikbyize Deus tihi:

— Kahyrytsa humo ka awatu tykta! — my. Iwaze mypunihikbyitsa humo asiba mysapybyitsatu tsimykaranaha. Deus humo hi mypunihikrētsa iwaze mysapybyri humo batu h̄y tsimykaranaha. Deus zikwy humo h̄y, katsa ibo tsimaha zeka atahi mymytsumuēhī h̄y.

14 — O katukytsa deusbyita hyrikoso ty ka arekektahaktsa! — my.

15 Ikiahatsa kaokze kaahyryinymyrētsa tsimaha. Kaharere bo mytsatyziu tsimykaranaha. Pauro harere wasani ja iwa ahape tu ahasopyk.

16 Sesus Kiristu mysapyzeky nihyrikosokda ana bo hi mytsaty tsimynakaranaha. Katsa tsimyzumubanahaze atsikara ty hauk tsimaha duabohotsa tsik takuze. Duabohotsa tsik tsipikunahaze Sesus spu bo mytsaty tsimykaranaha. Hawa mysapyzeky nihyrikosokda iwatsahi meky watu tsi-moziknaha. Iwaze tsipikunahaze Deus pe:

— O myzo ikia zuba amysapyrēnikita — tsimaha. Iwa tsimaha atsikara tsipioknahaze Sesus nury bo mytsaty tsimykaranaha. Tazikwy ty mybo nyny my iwaze mypunihikrētsa tsimoziknaha, iwaze hawa nihyrikosokda na ha mybo piwatawyky

17 Anawaze hi myzubarētsa atsikara estuba zuba tsipioknaha. Anawahi katsa Sesus humo myspirikporētsa parakbaha atsatu tsimoziknaha. Hawa atsikara estuba zubahaze iwa katsaktsa injury wata tsimoziknaha.

18 Sudeutsa soho humo mytsatyahaktsa. Tsapukte buruk harahare bete tадisahawы Deus bo ziwezokonaha. Usa tsapukte buruk ky Sudeutsa tадisahakanaha. Tадisahabanahaze tu tahapetusisopyk:

— O katsaktsa Deus tyryktsa tsimaha, mymasyarakat hÿ — nikaranaha.

19 Ahahyrinymyрëtsa deusbyita hyrikosotsa sipokzibyitsa. Asaktsa deusbyita hyrikosotsa asatu mytsaty mykaranaha disahawy sibo nyny niaha, iwaze sidisahawy humo mytsaty ahabyitsa tu mykaranaha.

20 Sidisahawy deusbyita hyrikosotsa nyny nikaranahaze batu Deus bo nyny maha. Hyrikoso sapybara disahawy ty zuba ibo nyny mykaranaha. Satanas hyrikoso sapybara pehaktsa disahawy ty hi nyny mykaranaha. Iwaze siharere bo ba hyÿ tahaktsa! Ahasopykziuhuktsa!

21 Duabohotsa tsik tsipikunahaze hawa Sesus mysapyzeky nihyrikosokda na ha bo mytsaty tsimykaranaha. Katsa ihumo Deus tyryktsa tsimoziknaha ana humo hi mytsaty tsimykaranaha. Iwatsahi usa tsik ba zikunaha anahi deusbyita hyrikosotsa bo nyny niaha, ana ty hi Satanas bo nyny mykaranaha. Iwatsahi ba petok kuha ba zikunaha. Atsikara tsipioknahaze:

— Sesus mysapyzeky nihyrikosokda — naha bo mytsaty tsimykaranaha iwatsahi ana disahawy deusbyita hyrikosotsa nyny niaha ba zibiaknaha. Petok tsahatsa disahawyty ba zikaha, usaka disahawy Satanas disahawy iwatsahi anaty ka ba zik kahadisahanaha.

²² Iwa tsimaha zeka katsa mypehakatsa myhumo taokaniki ana pokso hi mykparawybyitsa. Wasani zuba tsimaha. Mypehakatsa ipuni-hikanikita ana humo ka ja ahaspiriktsokda byihuja. Iwatsahi pykyhytutaha! Iwa tsimaha zeka mypehakatsa ahahumo ba ziktaokani! Iki-ahatsa humo tsizokdirēta mozik zeka batu myku tsimoziknaha. Iokzeka ikiahatsa hyrikoso sappybara pehakatsa ahakparawy iwatahi ahahumo tsizokdirēta mozik.

Ustsa tysipokzitsinahaktsa.

²³ Katsa Deus tyryktsa tsimaha iwatsahi hawa tsimyzihikiknaha wasani my. Anaharere bo yh̄ mykara. Utakta:

— Amy ty mytsaty my zeka yh̄ mykara. Ba aty tohi zikykzo, nanabyi ba zik tsumuēh̄i iwatahi iwaha ba zikzihikik iwatahi nanabyi humo ba ziky — my.

²⁴ Tyharape pokzitsikinahaktsa! Ba ababo zuba mytsaty zikaha. Ustsa kytsa humo ahamypokzitsihu!

²⁵ Nanabyi tyziborokonaha. Anazoho tsipisiknaha zeka ba ziktsasonaha:

— Naka deusbyita hyrikosotsa bo ky nyny niy — tsimaha. Iwa ba zikaha. Iwatsahi tsimaha zeka ba ahasikpyby ziyknaha.

26 Paikpa mytsaty mytsaty byitaha! Deus zuba mybarawytsa atahi abazubata. Mybarawy nizukni iwatahi nanabyi tisapyrēna nizukniki. Mybarawy ezektsa humo abazubata nanabyi humo kino niwatihi abazubata my Deus. Iwa Deus papeu humo botu ziwataha.

27 Aty maku Sesus humo ispirikpo byita zeka ahape my zeka:

- Kawahoro bo paku tyny. Katuk tsikadisaha
- my zeka. Iwahoro bo tsimytsuk tsihik zeka pakuty. Amy ty tadirahawy ty abo nyny my tsikadisaha. Iwa tsimaha zeka ba ahaskypyby ziyknaha. Soso byitaha:

- O naka ja. Deusbyita hyrikosotsa disahawy ba zikaha — tsimy.

28 Ta maku Sesus humo tsikaeni zuba ispirikpo zeka ata wahoro eze tu zeka ape:

- O naka deusbyita hyrikosotsa zoho — my. Iwa my zeka anaty ka ba zikadisaha. Tsipiboro zeka atahi iakubyita mozik. Tisikpybyrēta mozik. Ity hauk byizeka tsakurēta mozik ahahumo kino niwatihi. Ba aty tohi iakubyita sukni ahabyitsa tsimoziknaha.

29 Atahi Sesus humo tsikaeni zuba ispirikpo ahapokzitsikitsa. Ikiahatsa tsipahadisahakanaha zeka ahaokze ka wasani tsimykaranaha harape pokso hi batu ziboronaha iwaze tsakurēta mozik. Batu asikypyby my. Wasani my iwa ihumo ahapokzitsiukrētsa tsimaha.

30 Atyzeka ja piboro zeka tapara Deus pe my:

- O Deus kazo adisahawy humo kakurēta ikia hi kabu nyny tsiky — my. Iwa my zeka batu aty tohi kape:

— Azoho tsipiboroze batu wasani my. Kaokzeka ba wasani my — my.

³¹ O kytsa amy ty tsimykaranaha ty wasani tsimykaranaha. Tsipadisahanaha zeka tsipikunaha zeka nanabyi ty tsimykaranaha zeka Deus bo tsimykaranaha! Iwaze ustsa kytsa ahabo iktsa mahaze asahi:

— Deus zuba wasanita — maha. Ityryktsa bo iktsa mahaze iwa Deus soho maha.

³² Sizubarētsa okzeka ahamysapyrētsa tsimaha. Sudeutsa, Sudeutsabyitsa, Sesus humo sispirikporētsa iwa kytsa sizubarētsa okzeka wasani tsimyzurukunaha. Iwa tsimyzurukunaha zeka Sesus Kiristu bo yh̄y maha.

³³ Kawa tynakara. Uta ka wa kytsa tysitsumuēh̄i. Ustsa bo zuba ana humo hi mytsaty mykara. Kabo tisapyrēna bo ana humo hi batu mytsaty my. Iwa mozurukuze ustsa mysitsumuēh̄i. Sesus humo sispirikporētsa moziknaha ana humo hi mysitsumuēh̄i h̄y.

11

¹ — Uta Kiristu wata kasopyk mykara. Iwatsahi kawa tynakananahaktsa kytsa! — my.

Tsimyzumubanahaze hawa wytykyryk nakaranaha.

² Ikiahatsa humo kakurēta. Kabo mytsaty tsimykaranaha humo tsimy. Zibyituhukunahatu hawa ha ty ahahyrinymyryky naha ty hi tsimykaranaha. Wasani tsimykaranaha.

³ Abaka kaharere wytykyryk soho humo tsiwabytoktonaha. Kiristu Deus zipehata myzubarētsa mysipehaka. Atahi kytsa pehakatsa

mozik. Iwazahi wytykyryk tahapytsa harere bo yh̄y mykaranaha. Deus hi Kiristu pehatsa.

⁴ Iwatatu maku panu ty tatyharasuk iwa my zeka tasikpybyspyk mykara. Kytsa izumubanahaze maku itsorikbyita tu Deus bo mopamykysokoze Deus harere itsorikbyita tu motsasoko zeka wasani. Tatyharek bo my zeka Kiristu humo batu isopyksapy my.

⁵ Wytykyryk siza meky watu sisopyk taha-harek humo panu ty pu sisopyk. Deus bo tsimypamykysokonahaze ahaharek humo pupuhryktahaktsa. Deus harere ty tsimytsasokonahaze ahaharek humo puzubataha. Ahaty harek bo ahabyi zeka ahasopyk humo batu wasani zikaha. Asiza siharabihiza waza iwazahi sisikpybyrētsa Atatsa taty harek bo ahabyi zeka tisikpybyrētsa mozik.

⁶ Iwazahi asiza tahaty harek bo ka ha byizeka asiza pe my:

— Aharadi ty ka purubaiktaha — tsimaha. Iwa atatsa ahasopyk humo my zeka tisikpybyrētsa mozik. Atatsa batu taharadi pokzi batu h̄y ziky taty harek bo hyk my zeka batu asikpyby. Iwa my.

⁷ Makuta Deus wata iwatahi tatsorik ty batu puhyryk ziky. Deus nisisukni iwaze iharere bo hȳy mynakaranaha, tawahi ituk mynapykyryknaha. Wytykyryk nisisukni tahabariktsa harere bo yh̄y mynakaranaha.

⁸ Tapara Deus maku nizuknize batu wytyk ikny tybok. Wytyk Deus nizuknize maku pek tyhi wytyk nizuknize.

⁹ Deus maku nizuknize ba wytyk humo. Deus wytyk nizuknize maku bo nizuknize.

10 Iwaze Sesus humo sispirikporētsa izumubanahaze wytykyryk panuty taharek humo pu tahaktsa! Bijoikpe iknyktsa Deus tsumuē̄htsa sibo iktsa mykaranaha. Sihareksuk tuze tahabariktsa harere bo yh̄y mykaranaha bijoikpe iknyktsa bo mysiwatawy iwa tsizubarēna wasani piwatawy.

11 Katsa Sesus humo myspirikporētsa tuze batu taha zuba tsimyzurukunaha. Kytsa wytykyryk kino niwatihi tyharape pokzitsikinaha.

12 Deus koikny baktatu tapara maku nizukni. Iwaze maku pek zibokze wytyk nizukni. Abaka jabyitsa wytykyryk tsaresuk ikny napupurukuknaha. Nanabyi Deus humo zuba mynapykyryknaha. Kytsa wytykyryk ahatsa Deus iknyktsa.

13 Sesus humo sispirikporētsa zumubanahaze wytykyryk Deus bo mopamykysonaha. Deus bo mopamykysonahaze itsorikbyiza ahaokze ka batu wasani tsimaha. Iwa mytsaty tsimaha.

14 Katsa mypetu mysopyk:

— O kytsa siharadizezerētsa zeka batu sapy — tsimaha. Iwa mytsaty tsimaha.

15 Wytykyryk meky watu maha. Siharadizezerēza zeka katsa hi:

— O asiza simoksapyrēza. Siharadi sapyrēza — tsimaha. Sipapiritsa tazahara buruk siharadi iwa.

16 Iwa my. Wytyk Deus bo mopamykysokoze ahaharekbowy ty puhyryktyktsa! Iwa my sizubarētsa kaharere bo yh̄y mykaranaha. Sispirikporētsa kaharere bo yh̄y mykaranaha. Kytsa ipehatsitsa myharapepehañkiknaha zeka kaharere sibo tsimytsasonaha.

Tsinauzuzukbanahaze hawa Sesus Kiristu bo mytsaty tsimykaranaha.

¹⁷ Kyze tsinauzuzukbanahaze wasani ahasopyk byitsa tsimykaranaha. Tsinauzuzukbakanahaze tahatukytsa ba ziksitsumuēhīnaha tsimysiaknikinaha. Sesus humo batu tsimysispirikpotohi tsimysiaknikinaha zuba. Iwaze ahahumo batu kaokanisorok kasakparēta mynakara.

¹⁸ Wastuhu kytsa kape nikaranaha:

— Korītio ezektsa mynauzuzukbanahaze myharapepehañkiknaha. Sasabyitsa mykaranaha — niah. Tozeka ja anaharere humo wasani my.

¹⁹ Sasabyitsa humo pykyhytu tahaktsa. Batu wasaniha. Ikiahatsa hi:

— Aty tsimysapyrēta zeka mymyhyrinymyry-naha — mytsaty ahabyitsatu tsimykaranaha. Iwa mytsaty tsimykaranaha zeka Deus okzeka batu imysapy my.

²⁰ Tsinauzuzukbanahaze mypehatsa Sesus nihyrikosokda nahabo mytsaty tsimykaranaha. Ahadisahawy tsizubarēna zeka Sesus harere bo batu hyŷ zikaha iwaze tsipahadisahakanahaze Sesus Kiristu ba ahapehakatsa ziky.

²¹ Ikiahatsa kino ahadisahawy tyty tsikahadisahanaha. Iwatsahi tapara mozumunahatsa siharaze tu nityryk nymyhyrybyiba naha mytahadisahabanaha siapikwaktsitsa ba amy tohi ty hauk zikaha. Ustsa kytsaktsa sitsauziurētsa iwatsahi siapiktsa zumukunahatsaktsa siaraparētsa nikaranaha. Ikiahatsa zikaha piperynahabyitsa ahadisahawy ty zuba tsikahazisanaha.

²² Ikiahatsa humo kaokanirēta. Aharaparētsa zeka ahawahoro eze tu tsikadisahanaha. Deus

tyryktsa tuk tsinazuzukbanahaze wasani tynakaranahaktsa! Asaktsa sinamybyitsa ahatuk zeka ba ziksmyiw. Ahadisahawy humo haukbaik tsimaha zeka sinamybyitsa ahahumo sisikpybyrētsa moziknaha. Iwa maha pokso hi ahasopykziuhu ja.

Sesus mysapyzeky nihyrikosokda naha bo mytsaty tsimykaranaha.

23 Sesus mypehatsa zikyrinymyryky naha ty pahahrinymyryky. Ihyrikosokdawy soho bo mytsaty tahahaktsa! Tapara Sudas unata isopyksapybyita Sesus sukyrytsitsa ibo zioktyhyrykze Sesus atsikara waha ty okok niy. Deus pe nikara:

24 — Ikia humo ka kakurēta – niy. Atsikara ty zuktsa niyze. Zinymyrykynahatsa bo nyny niy:

— O na ty hauk tahaktsa! Anaty hauk tsimykaranahaze kanury soho bo mytsaty tynakaranaha. “Sesus mysapyzeky nihyrikosokda” tsimykaranaha – niy.

25 Kyze tahadisahabanahaze taoporosuk ty okokzo niy. Iwaze hi:

— O naka kaspubaba. Mohyrikosokdaze Deus wasania ty mybarawy ezektsa bo motsaso. Tsō tsimahaze kaspu soho bo mytsaty tynakaranahaktsa. Duabohotsa tsik tsipikunahaze kahyrikosokzawy bo mytsatytahaktsa – my! Iwa kapehatsa zikyrinymyryky niy.

26 Iwatsahi katsa atsikara waha tyhauk tsimahaze Sesus mysapyzeky nihyrikosokda ana humo hi natawatawyky. Atsawatu duabohotsa tsik

tsipikunahaze kino niwatihi Sesus hyrikosokdawy natawatawyky. Atahi taperyky. Iwa ibo mytsaty tsimynakaranaha, aiba zuba Sesus mybarawy bo myziksizo.

27 Aty atsikara waha ty hauk my zeka batu wasani my atahi pimyiki. Sesus hyrikosokdawy soho humo myzisapybyiki. Atahi duabohotsa tsik piku zeka batu wasani ziky atahi pimyiki. Sesus hyrikosokdawy humo Deus batu ziokzo.

28 Iwatsahi tapara atsikara waha ty hauk ahabyizetu mytsaty tsimaha duabohotsa tsik kino niwatihi tsõ ahabyizetu tapara mytsaty tsimaha. — Deus okzeka ja wasani mykara, iharere bo ja hyŷ mykara — tsimy. Iwa mytsatytahaktsa! Iwaze hauk tsimaha, iwaze tsõ tsimaha.

29 Sesus Kiristu mysapyzeky iharapatawyhyta humo nihyrikosokda ana humo hi tsikspiriktsokdanaha zeka batu hauk tsimaha. Batu tsõ tsimaha. Pykyhytutaha! Tsipihauknaha zeka ahaspirikpobyltsa zeka Deus okzeka batu ahamysapy. Iwatahi pahasiniwiy.

30 Wastuhu mektsaktsa ahatuktsa botu zihauknaha asahi wasanibyitsa nikaranaha, iwatsahi simyitsapyrētsa niyzikiknaha. Siakubyitsa niyzikiknaha. Wastuhu niakbakanaha.

31 Tapara atsikara ty hauk byizeka Deus pe tsimykara:

— O kazo aokzeka ja kamysapybyita ikykara — tsimykara. Ahamysapybyitsa tsimykaranaha zeka ibo tsimytsasonaha iwaze ahamysapybyi Sesus humo pahaokzohik. Mospiriktsokda. Iwatsahi batu sinini tsimaha.

³² Deus hi mymspirikpowyky. Iwatsahi tsimysapybyikinaha zeka mymyitsapyrywy. Iwatsahi Sesus humo sispirikpobyitsa tuk ba sinini ykarawy bo ba zikmypeha. Botu iharere humo hyŷ tsikaha.

³³ Iwaze katukytsa tsinakypyknahaze, Sesus Kiristu hyrikosokdawy humo mytsaty tsimykaranaha tyharape perykynahaktsa. Sizubarêtsa mynauzuzuknahaze iwaze tsikadisahanaha my.

³⁴ Aty irapa zeka awahoro eze tu tsikadisaha iwaze hi Deus wahoro bo my. Iwaze Deus humo mynauzuzukbanahaze ba ziktsaso:

— O hawa tsimykaranaha humo ka wasanibyitsa tsimykaranaha — my. Iwa ba ziktsaso.

Kyze botu kabo tsiwatahakanaha anatyhi ababo pomoze kapehawy ahape my. Iwa my.

12

Deus hyrikoso tisapyrēna ty mybo nyny my.

¹ Kyze — O katukytsa ahapapeu humo kabo tsiwatahakanaha:

“Hawa Deus hyrikoso mytuk mynapykyryk. Hawa Deus hyrikoso isapyha ty mybo nyny my” — tsikaha. Abaka ana humo hi pahahyrinymyry.

² Taparaka ahspirikpobyitsaze deusbyitsa hyrikosotsa bo yhŷ tsiknakaranaha. Deusbyitsa hyrikosotsa asaktsa ba ziktsasonaha, sihumo pahaspikhbataikiknaha iwaze pahamyiwikiknaha.

³ Abaka meky watu tsimaha. Ikiahatsa kytsa bo iktsa tsimykaranaha. Asahi:

— Hawa tsimykaranaha zeka Deus hyrikoso mytuk mynapykyryk ihumo zuba tsinakaranaha — nikaranaha. Ata my zeka:

— Sesus kapehakatsa my — Deus hyrikoso humo Sesus soho myharereziwy. Ustsa Sesus soho humo myzisapybyrikinahaze asahi Deus hyrikoso ba situk mynapykyryk simyspihikbatanikitsa maha. Asaktsa Deus hyrikoso situk mynapykyryk tsinymyrykynaha. Asa kino niwatihi simyspihikbatanikitsa tsinymyrykynaha. Iwatsahi ahamytsatyziuhuktsa kytsa.

⁴ Deus hyrikoso tisapyrēna ty nanabyi waha. Kytsa myziaksekenaha atsatu mybo nyny my, Deus hyrikoso ata zuba.

⁵ Katsaktsa mytarabajawy humo nanabyi humo mysopyk Deus bo zuba tarabajaziu tsimykaranaha. Mypehatsa estuba zubata ata bo hi tarabaja tsimykaranaha.

⁶ Deus zikwy humo katsaktsa meky watu tarabaja tsimykaranaha. Deus hyrikoso tisapyrēna ty mybo nyny my. Deus zuba mymyhyrinymyryky. Myzubarētsa mymyhyrinymyry. Mytytsumuēhī byizeka katsaktsa batu myhyrinymyry.

⁷ Deus hyrikoso mytuk mynapykyryk. Hawa my meky meky waha tu mytuk mynapykyryk. Mywatu estuba meky meky watu nyny my. Sesus humo sispirikporētsa Deus zikwy piwatawy, iwaze ustsa Sesus humo sispirikporētsa mysitsumuēhī iwa hŷ.

⁸ Iwaze wastuhu kytsa Deus hyrikoso zikwy humo ispirikpowy babata motsasoziuku. Usta

Deus hyrikoso zikwy humo Deus harere kytsa mysihyrinymyryziuku.

⁹ Mektatu Deus hyrikoso zikwy humo Sesus humo mysispirikpotohinaha. Usta maku simyitsapyritsa mysizororowykynaha Deus hyrikoso zikwy humo zuba.

¹⁰ Usta amy ty kytsa zikahabara ty ana humo hi mykara Deus hyrikoso zikwy humo zuba. Mektatu Deus harere motsasoko. Usta Deus hyrikoso zikwy humo mymytsatyhyky. Aty zeka motsaso Deus hyrikoso humo tsihyrinymyrēta. Aty zeka motsaso hyrikoso sapybara humo anatyhi mymytsatyhyky. Usta Deus hyrikoso zikwy humo nanabyi siharere motsasoko, anaharere humo batu aty tohi ihumo ihyrinymyry hukbyita. Mektatu amy ty usta harere nitsasoko, anaharere humo tsihyrinymyrēta. Kytsa bo motsasoko kytsa harere sibo motsasoko.

¹¹ Iwa Deus hyrikoso tisapyrēna ty nanabyiwaha. Ihyrikoso mywatawyhytsa estuba tisapyrēna ty mybo nyny my iwa atahi mozihikik.

Sesus tuktsa mynury wata.

¹² Mynury estuba zuba. Mynury humo nanabyi iwatatu estuba zuba tsimaha. Iwata katsa Kiristu humo myspirikporētsa tisapyrēna ty mybo nyny my iwatatu estuba zuba wata tsimaha.

¹³ Sizubarētsa Sesus humo sispirikporētsa. Asaktsa ihumo nimyharasusukunaha. Deus hyrikoso humo hi estuba zuba Sesus humo sispirikporētsa. Sudeutsa ihumo sispirikporētsa, Sudeutsabyitsa ihumo sispirikporētsa, kytsa sinamybyitsa sinamyrētsa kino niwatihi iwa kytsa aparakbaha Sesus humo sispirikporētsa. Deus

hyrikoso situk mynapykyryk iwaze meky watu niyzikiknaha. Sesus Kiristu wata niyzikiknaha. Sizubarētsa Sesus Kiristu nury wata niyzikiknaha estuba zuba tawa.

14 Kytsa ustsa kytsa mymytsumuēhīnaha. Hawa mynury estuba zubata tu myhumo nanabyi maha, myharek, mytsyhyrypetsa, myhyrytsa iwa iwahi kytsa Sesus humo sispirikporētsa tarabaja meky watu mykaranaha. Iwaze estuba zuba ispe-hakatsa my.

15 Mypyrytsa maha zeka:

— O katsaktsa itsyhyrype humo tsabyitsa iwasahi batu inury humo — maha. Iwa zeka mynury eze tu maha. Ba zikpyk.

16 Myspiuke my zeka:

— O uta ihyrizik humo tabyita iwatahi batu inury humo — my. Iwa zeka mynury eze tu my. Ba zikpyk.

17 Mynury ihyrizik zuba zeka batu waby zikaha. Mynury ispi pamabyita zuba wata zeka batu nu zikaha.

18 Deus nimysuknize nanabyi meky watu nizuknniki. Mynury estuba zuba.

19 Atsatu zuba zeka mynury ba zikyzik.

20 Mynury estuba zubata tu nanabyi myhumo tsihohokrēna.

21 Mynury eze sapybarasukni aha. Myharek humo mytsaty tsimykaranaha. Mypyrytsa humo natatabaka. Mytsyhyrypetsa humo tarabaja tsimynakaranaha. Myhyriziktsa humo iktsa tsimynakaranaha. Iwa nanabyi maha. Paikpa tyharape tsumuēhīnaha. Anawahi

katsa Sesus humo myspirikporētsaktsa tyharape pokzitsikinahaktsa!

²² Myokzeka wastuhu nanabyi mynury eze batu pykyhy myhyrizikwybyita zeka mytsaty ahabyitsa tsimykaranaha. Ana nanabyi mohokda zeka tsimyitsapyrenaha.

²³ Wastuhu nanabyi humo mysikpybyrētsa. Iwatsahi mysuk natawaskik. Katsa nanabyi tapokzitsiki. Kytsa nanabyi bo iktsa mykaranaha zeka mysikpybyrētsa.

²⁴ Mynury nanabyi tisapyrēna tsikaeni zuba natapokzitsiki. Wastuhu zuba anahumo ka mysikpybyrētsa natapokzitsiki hŷ. Hawa mynury tasapywyky anawahi Sesus tuktsa myhyrizikwanibyitsa tysipokzitsikinahaktsa kytsa!

²⁵ Deus hi nanabyi mynury humo nizukniki. Mynuryta estuba zuba. Iwa katsa tsimyzurukunaha! Nanabyi metutu ba zikuru, katsa asta ske buruk tu tsimykurunaha tsa watsa iwa tsimyzurukunaha. Utsa bo mytsaty taha.

²⁶ Mynurywatu mymyitsapyri zeka batu myku tsimaha. Mynury humo myitsapyri byizeka mykurētsa. Katsa Kiristu nury watsa tsimaha. Mytukytsa usta Sesus tuktsa simyitsapyri zeka katsa sihumo batu myku. Mytukytsa sakurētsa katsa niwatihi situk mykurētsa.

²⁷ Mynury nanabyi my iwatsa katsaktsa Kiristu nury nanabyi watsa tsimaha. Mywatu nanabyi meky watu katsaktsa inury estuba zuba tsimaha.

²⁸ Deus hi Sesus humo sispirikpotsaktsa mysipehaka situkytsa mysitsumuēh̄. Ahatuktsa Deus nisiakzohokonahatsa nispeha. Iwaze ustsa Deus harere sohokotsa. Iwaze asaktsa

Sesus humo sispirikporētsa mysihyrinymyry. Wastuhu Deus zikwy piwatawykynaha, amy ty kytса zikahabara ty anatyhi mykaranaha iwa Deus zikwy piwatawykynaha. Ustsaktsa mozororokotsitsa. Ustsaktsa tisapyrēna ty mysitsumuēhīnahatsa. Iwaze asaktsa tahatukytsa Deus bo mysioktyhyryknaha. Iwaze ustsa meky watu siharerekitsa bo motsasokonaha. Deus tisapyrēna ty Susus humo sispirikporētsa bo nanabyi humo nyny my. Iwa.

²⁹ Batu sizuba Deus ykzohotsa sizubabyitsa tu. Deus sohokotsa kino batu sizuba. Si-hyrinymyrykytsa kino niwatihi batu sizuba. Deus zikwy humo piwatawynahaktsa kino batu sizuba.

³⁰ Simyitsapyritsaktsa mysizororowy nahatsa batu sizuba. Meky harere humo tu motsasokona-hatsa batu sizuba. Siharere humo zinymyrykyna-hatsa iwaze taharere ty motsasoko batu sizuba.

³¹ Deus tisapyrēna ty nanabyi ty mybo nyny my. Deus tisapyrēna humo puētsik tyzihikiknahaktsa kytса. Iwatsahi Susus tuktsa mysitsumuēhītohi ana hi tsimyzihikiknaha ana hi ikiahatsa bo pi-watawy.

13

Hawa tsimyharape pokzitsikinaha.

¹ Kytsa ustsa tynasipokzitsikinahaktsa! Uta sasabyitsa harere humo motsasoko siharere ty tynymyrybyitatу motsasoko zeka bijoikpe iknyktsa harere humo niwatihi motsasoko iwa zeka ustsa kytса ba ziksipokzitsiki kaharere isuka zuba. Maku kariku humo zaza mykaraze tawata

isuka zuba. Ata ykpyri wa zeka Deus okzeka utakta myspihikwybyita mykara.

² Deus harere sohokotsa motsasoziuikik zeka mykara. Iwaze kytsa sihyrinymyrētsa ana hi pinymyryba zeka hawa tsihokdaharēna ana hi pinymyryba. Iwa zeka Sesus humo kaspirkoporēta mozik iwaze hawa kytsa zikahabara ty at-satu mykara. Iwa my zeka ustsa kytsa mysipokzitsi byizeka Deus okzeka utakta myspihikwybyita mykara.

³ Kanamy tsizubarēna ty sinamybyitsa bo nyny myzeka. Iwaze sispirikpobyitsa kanury izo bo pioktsoknaha zeka mokorobaik, Sesus harere humo kaspirkoporēta. Iwa zeka ustsa kytsa ba zik-sipokzitsi ana humo kino batu kasopyksapy. Ustsa kytsa humo mysipokzitsi byizeka, Deus okzeka myspihikwybyita mykara.

⁴ Katsaktsa ustsa kytsa humo mymypokzitsiukrētsa tu zeka sihumo batu mysakpare mykubyrisorokrētsa tsimaha. Sibo nyny tsimaha. Sibo nnyzo tsimaha. Sihumo batu myzokdi. Katsaktsa batu mypetu mysopyk:

— O katsa zuba myhyrinymyрētsa. Katsa zuba abazubatsa tsimaha — iwa ba ziktsaso.

⁵ Ustsa humo tahapokitsikinaha zeka wasani tsimykaranaha. Batu mybo zuba tsimykaranaha ustsa bo mytsaty tsimykaranaha. Batu aidy mytysakani mysopyk tsimaha. Ustsa hawa myhumo sisopyk batu sihumo ziktahakyrikinaha.

⁶ Ustsa mysisapybyikinaha zeka anahumo hi batu myku tsimykaranaha. Asaktsa wasani mozrukunaha zeka mykurētsa tsimaha.

7 Ustsa kytsa humo tsimysipokzitsiknaha zeka sisoho mymyharereziuwyky. Katsa tihi:

— Deus abazubata ba hawa tohi zikzuknina — tsimaha.

Ustsa humo makubyrisorokrētsa tsimoziknaha. Taperykynaha ustsa sihyrizikporētsa moziknaha ana hi taperyky. Batu myhyrizikbara.

8 Ustsa tahapokzitsikinaha zeka mywahi tsimynapokzitsikinaha. Ba zikpyk tsimaha. Deus tisapyrēna ty tasohotsitsa bo pepyk. Aba zuba Deus harere motsasokonaha aibapepyk. Deus isapyrēnikia ty kytsa bo ustsa harere motsasokonaha zeka, siharere humo ihyrinymyrybyita tu ana kino pepyk. Aba zuba mektsa harere ty zuba motsasokonaha aiba tohi pepyk. Deus tisapyrēna myhyrinymyrywy pe kino niwatihi pepyk.

9 Tsinymyrynah humo tsikaeni zuba myhyrinymyry. Deus harere sokotsa tsikaeni zuba motsasoko.

10 Deus tuk mywahi tsimynapykyryknaha zeka tanymyry baba. Sisohokotsa mohokdanaha katsa tsimytsasobanaha.

11 Jabasize hawa jabasta ziknatsasoko nahawa ikttsasoikik. Hawa jabasta tuze mytsaty ziknakara nahawa mytsaty ikykara. Hawa jabasta sopyk wa uta kino niwatihi kasopyk. Abaka batu. Utakta abaka ikypyk hawa jabastuze ziknawakyriki abaka batu kawakyri ikzihokza.

12 Abaka hawa Deus mykara tsikaeni zuba tanymyryky. Katsaktsa kytsa watsa asahi moknywy bo iksa maha. Ba zikozoziuunaha. Tsikaeni zuba iksa maha. Katsa siwatsa tsimaha. Aba zuba Deus soho tsikaeni zuba

tsinymyrynah. Katsaktsa ituk mywahi tsimynapykyryknahaze iwaze tanymyryba. Aba Deus nimynyziu katsaktsa ituk mywahi tsimynapykyryknaha zeka tanymyryba niy.

¹³ Iwaze katsaktsa Deus humo myspirikporētsa. Ituk mywahi tsimynapykyryknaha ana hi tsimyzihikiknaha. Ana hi taperyky. Katsaktsa ustsa tahapokzitsikinaha. Deus okzeka Sesus humo myspirikporētsa tuze wasani tsimykaranaha. Ituk mywahi tsinapykyryk tsihikiknaha zeka ana kino wasani tsimykaranaha. Katsaktsa ustsa kytsa humo tahapokzitsikinahaze ana humo ka wasaniha zuba tsimykaranaha tisapyrēna ty tsimykaranaha.

14

Deus hyrikoso tisapyrēna ty nanabyi motsaso-hokozo.

¹ Deus bo mektsa harere ty tsimytsasokonaha zeka wasani, katsaktsa Deus harere ustsa kytsa bo tsimytsasokonaha zeka wasani tsimykaranaha iwahi tsimyzihikiknaha. Iwaze tyharape pokzitsikinahaktsa kytsa! Deus isapyrēnikia ty kino niwatihi tsimyzihikiknaha! Isapyrēnikia ty wasaniha zuba tynazihikiknaha wasaniha iharere tsimytsasonaha. Ana humo hi ipe tsimaha:

— O Deus ahyrikoso mynapykyryk iwaze aharere ustsa bo tsimytsasokonaha — tsimaha.

² Aty meky watu iharere zeka Deus zikwy humo atahi Deus bo zuba motsasoko. Katsaktsa batu myhyrinymyry. Iharere tsihokdaharēna. Deus

hyrikoso humo motsasoko, kytsa humo ka iharere tsihokdaharēna.

³ Atahi Deus harere motsasoikik sizubarētsa bo motsasoko batu iharere hokdaha. Deus harere motsasoko iwa kytsa mysitsumuēhīkī. Motsaso zeka mysiakusukniwyky iwatsahi mysipunihikwyky. Iharere humo nipybybyrinaha.

⁴ Iwaze asaktsa mektsa harere tu motsasokonaha asatu tahatsumuēhīkīnaha. Utsa kytsa Deus harere motsasokonaha Sesus tuktsa sizubarētsa mysitsumuēhīkīnaha iwatsahi mysitsumuēhītohinaha.

⁵ Ikiahatsa mektsa harere humo tsimyt-sasokonaha zeka ahakurētsa tsimaha. Ikiahatsa hi Deus harere tsimytsasokonaha zeka nawahi ahakparawy iwaze ahakurētsa. Asahi Deus hyrikoso humo mektsa harere humo motsasoikiknaha Deus bo tarabaja mykaranaha. Atakta Deus harere motsasoikik tarabajaziu mykara hŷ. Aty Deus zikwy humo mektsa harere tuk piny zeka wasani my, atahi siwabytsitsa izumubanahaze iharere sibo motsaso. Batu aty tohi siharere humo sihyrinymyry byizeka atahi kytsa bo motsaso.

⁶ O katukytsa ikiahatsa bo mynakozore zeka mektsa harere humo ababo motsaso zeka ba zikatsumuēhī. Deus botu kape niy ana hi ababo motsaso zeka ana hi pahatsumuēhī. Deus harere, ana ty hi Deus tahirikoso humo botu kabo zi-watawy, ana kino pahatsumuēhī ahaharere humo motsaso zeka pahatsumuēhī.

⁷ Berekzetsa sisukapykrētsa. Byryzykuyktsa seroktsa ahatsa niwatihi sisukrētsa. Aty bereketsa humo pamkyzu byizeka katsaktsa tsimaha:

— O bereketsa batu mykparawy sisuka zuba — tsimaha.

⁸ Aty porawy eze isapybara pŷ mykaraze tawata batu wasani ziky iwa zeka sodadutsa ba ziktahazoziknaha.

⁹ Anawahi meky watu ahaharere tsimypamykysonaha zeka siwabytsitsa ahaharere humo batu sihyrinymyry, iwatsahi ahaharere bo batu waby zikaha. Sihyrinymyrybyitsa tu ahaharere bo batu waby zikaha.

¹⁰ Mybarawy eze nanabyi myharere. Aty mypubara ty iharere ty mopamykysoko zeka batu iharere hokzaha.

¹¹ Aty mekyharere humo motsasoko zeka atahi bipyri iharere humo batu kahyrinymyry. Uta kino niwatihi ihumo bipyri wata my kaharere kino meky watu tahi.

¹² Ikiahatsa Deus humo isapyrēnikia ty tsimyzihikiknaha zeka. Asahi Sesus humo sispirikporētsa mysiakusukniwyky, kytса mysitsumuēhī ana hi tsimyzihikiknaha!

¹³ Aty taharerebara humo mopamykysoko zeka tapara Deus bo typamykyso:

— O myzo azikwy humo tyziktsumuēhīkta iwaze kaharerewabytsitsa bo aharere motsaso. Amy ty mekywatsa harere motsasoko siharere motsasoko — my. Iwa tsimy!

¹⁴ Deus bo mekywatsa harere ty mopamykysoko zeka amy bara tu motsasoko kahyrinymyrybyita. Kahyrikoso Deus bo motsasoko.

¹⁵ Iwatahi kahyrikoso tuk Deus bo mopamykyso, kaharere niwatihi Deus

bo mopamykysó anaharere kytsa nimyhyrinymyrykynaha. Kahyrikoso tuk Deus bo mosakibaziki, kaharere tuk niwatihi Deus bo mosakibaziki ana myharere kytsa nimyhyrinymyryky.

¹⁶ Ahyrikoso tuk zuba Deus bo tsimy-pamykysokoze mekywaha harere humo hi:

— O Deus myzo ikia zuba amysapyrēnikita — tsimy. Ustsa sihyrinymyrybyitsa aharere bo batu yhŷ zikaha, aharere sihumo tsihokdaharēna my.

¹⁷ Hawa ha tsimytsasoko zeka Deus humo tisapyrēna my. Asaktsa ba atuk mynapykyknaha ba ziksitsumuēh̄i.

¹⁸ Wastuhu ahatuk Deus zikwy humo motsasoko. Utakta meky harere humo Deus bo abazuba motsasoko Deus bo kahyrikoso mynakara. Iwatahi ipe my:

— O Deus myzo isapyrēnikia ty kabo nyny ty my, anahumo kakurēta — my.

¹⁹ Sesus humo sispirikporētsa izumubanahaze situk my zeka, mekywaha harere humo ba ziktsaso. Asaktsa kaharere piwabynaha siharee zuba motsaso iwa mysitsumuēh̄i. Deus harere humo mysihyrinymyry. Mektsa harere tu motsaso zeka tsizubarēna harere batu aty tohi kaharere humo ihyrinymyry. Siharee humo motsaso zeka wastuhu piny myrynaha, sizubabyitsa harere motsaso zeka, mysitsumuēh̄i.

²⁰ O katukytsa siypyktsa wa tynakaranaha! Hawa mytsaty tsimykaranaaha zeka siypyktsa watsa tsimaha. Sihyrinymyrētsa. Kytsa asahi pahasapybyikinahatsa siwaka ba zikaha. Asahi jabyitsa watsa mykaranaaha.

21 Deus harere papeu humo iwatahaha:
 – Mybarawy ezektsa bo motsaso.
 Mektsa harere humo sibo motsaso.
 Kytsa bipyritsa harere botu iktsaso.
 Iwa iktsasoze batu kabu waby – niy.

22 Iwaze katsa mekywaha tu tsimytsasonaha
 zeka sispirikpobyitsaktsa sipybyrētsa. Anaharere
 humo Deus sibo ziwatawy. Sesus humo
 sispirikporētsaktsa batu sipyby. Deus
 harere tsihyrinymrykynaha zeka anatyhi
 sispirikporētsa. Anaty hi sispirikpobyitsa bo my.

23 Ahaspirikporētsaktsa tsimyzumubanahaze
 Deus harere tsiwabynaha. Tozeka ja
 ahazubarētsa mektsa harere tu ja tsimytsasonaha.
 Sispirikpobyitsa napupunaha zeka asahi:

– O asaktsa sityrykmyirētsa – maha.

24 Deus harere tsimytsasonaha zeka iwaze
 sispirikpobyitsa napupunahaze ahaharere
 piwabykynahaze:

– O katsaktsa mysapybyitsatu tsimykaranaha.

25 Deus okzeka mysapybyitsa tsimykaranaha.
 Isapy bara bo mytsaty tsimykaranaha –
 maha. Sispirikpobyitsa humo hi Deus bo
 mopamykysokonaha. Asahi:

– O Deus myzo ikia zuba amysapyrēnikita. Ikia
 hi inazuzuknahatsa tuk tsimypykyryk. Ana humo
 hi myhyrinymyrētsa tsimaha h̄y – maha.

Tsizumubanaha zeka wasani tsimaha.

26 Iwaze katukytsa tsimyzumubanahaze
 tyharape tsumuēhīnahaktsa! Ustsa kytsa
 mysiakusukniwykynaha. Estuba Deus
 bo mosakibazi! Usta Deus harere humo
 kytsa mysihyrinymry. Mektatu Deus ibo

nitsasokonaha sizubarētsa bo motsasoko. Usta mekyharere humo tu motsaso iwaze mektatu iharere humo myharere baba humo motsaso iwaze sizubarētsa pinymyrykynaha. Ana humo kino sizubarētsa humo tyharapetsumuēhīnaha h̄y.

27 Tozeka ja sizubarētsa mektsa harere humo motsaso tsihikiknaha. Petoktsa zuba tupamykysonaha. Hawa zeka harakykbyihitsa tupamykysonaha. Estuba tapara mopamykyso iwaze anaharere hi pinymyry atakta ustsakytса bo siharere humo motsaso. Atakta mopykze usta mektsa harere humo tu motsaso. Iwa h̄y. Batu sizuba mektsa harere motsaso.

28 Ba aty tohi iharere humo ihyrinymyry by-izeka ba opykani zikpamykyso. Myharere ustsakytса bo motsaso ba zikaha batu iharere my. Taha bo zuba motsasonaha Deus bo niwatihi motsasonaha iwaze ibo zuba motsaso. Tsinauzuzuknahaze batu harere ziky.

29 Hawa ha Deus tasohotsa bo nitsasokonaha anahi petoktsa motsasokonaha. Tozeka ja harakykbyihitsa. Ustsakytса siharere ziwabyziukunahaktsa! Asahi:

— O anahi ja Deus hyrikoso mybo motsasoko. Iharere baba ja — maha. Iwa isohotsitsa harere bo mytsatyziutaha.

30 Aty motsasokoze tozeka ja Deus harere usta my. Iwaze tapara maku harere niwazuba usta maku Deus harere kytса bo motsasoko.

31 Sizubarētsa Deus harere motsasokonaha. Taparaka estuba zuba motsasoko, ata pepykze usta motsasoko. Iwaze sizubarētsa mysiakusukniwykynaha. Deus

harere humo mysihyrinymyrykynaha. Iwa tyharapetsumuēhīkīnaha.

³² Deus sohokotsa mozihikiknaha zeka motsaso naha. Ity tsihik byizeka ba ziktsasonaha ustsa kytса mysiperynaha iwa zeka wasani my.

³³ Iwa ahasopyk zeka. Deus tsakurēta mozik katsa tsinauzuzuknahaze wasani tsimaha. Katsa wasani ahabyizeka Deus batu iaku.

³⁴ Kyze tsinauzuzukbanahaze ka wytykyryk siza piwabynaha zuba. Iwa nanabyitaba Sesus humo sispirikpowy maha. Wytykyryk taparaktsa harere bo hyň ziknakaranaha. Iwazahi simywabykyza zubaza. Tubabatu Sudeutsa iwa ziknasspirikpokonaha.

³⁵ Hawaha ty tsihokdaharēna zeka iwazahi batu sihyrinymyryhuk ana humo hi tahawahoro bo myziksonahaze tahapytsa pe maha:

— O atakta iharere humo batu kahyrinymyryziu amy sa niy — maha. Katsa mysopykik wytykyryk tsinauzuzuknahaze Deus harere tsipiwbbynaha wytykyryk motsasokonaha zeka tahasikpyby piyknaha.

³⁶ Tozeka ja kamypehawy ba ahakparawy. Deus harere ikia bo zuba ahabara sasabyitsa bo. Iwatsahi ba zikaha:

— Katsa zuba Deus harere humo myhyrinymyrētsa — tsimaha. Iwa ba zikaha.

³⁷ Asaktsa ahatuk Deus sohotsitsa kaharere bo yhň mykaranaha. Ustsa ahatuk Deus zikwy piwatawynaha kaharere bo yhň mykaranaha. Asahi:

— O Pauro ziknakaranaha wasani my. Deus hi ipe niy — mykaranaha.

38 Aty kaharere iakparawy byizeka iharere humo kino ba ahakparawy. Kaharere bo ba hŷ ziky. Iwatsahi Deus sohokotsa batu ahanyhŷ.

39 Nawa katukytsa ikiahatsa Deus pe tsimaha:

— O Deus myzo azikwy mytuk mynapykyryk iwaze aharere kytsa bo tsimytsasonaha — tsimaha. Ikiahatsa ustsa kytsa batu tyso:

— Ba mektsa harere humo ba ziktsasonaha ba ziky — Iwa batu ustsa pe tsimaha.

40 Tsimymyzuzuknahaze wasani tsimaha. Iwa Deus ahahumo tsakurēta my wasani tsimykaranaha.

15

Deus Kiristu zihyrizikpowy.

1 O katukytsa Deus wasania ty botu ahabo iksaso ana bo hi mytsatyziutaha! Jatuba tu ana wasaniha humo tsikspirikpokonaha, anaharere bo hyŷ tsikykaranaha, iwa ahasopyk.

2 Anaharere Deus wasaniha iwatsahi anaharere bo zuba hyŷ tsimykaranaha. Anaharere humo hi Deus pahaoktyhyryk usa harere humo ka Deus ba zimyokty. Deus harere humo hyŷ ahabyi zeka batu Deus tuk zikopykyk. Deus wasaniha humo zuba pahaoktyhyryk.

3 Hawa Deus zikyrinymyryky naha ty atsatu zahahyrinymyryky. Kiristu mysapzyeky nihyrikosokda ana hi Deus wasaniha. Ahamysapzybyri humo nihyrikosokda iwaze ahamysapzybyi tsimykaranaha zeka ihumo pahaokzohik mospiriktsokda. Deus harere botu papeu humo iwatahaha abo kino atsatu.

⁴ Nihyrikosokdaze ziptyknaha. Harahare hoke bo nitsahoroknaha. Iwaze petok zuruze Deus zihyrizikpowy. Harahare hoke ezekta izoihik inury ezytyk niyzik. Ana hi botu Deus harere papeu humo iwatahaha aba kino atsatu.

⁵ Peduru bo natakaha. Iwaze dose siakzohotsa bo natakaha niy.

⁶ Iwa asa itukze ziknakaranahatsa bo kahazuba ziknakara. Sizubarētsa bo natakaha niy 500 kijētostsa bo. Iwaze Sesus ispitu niyzikzo. Meksaktsa botu niakbakanaha ustsaktsa asatutsa mynapkyryknaha asahi mybo motsasokonaha.

⁷ Iwaze Tsiaku bo natakaha kyze siakzohotsa sizubarētsa bo natakaha.

⁸ Iwaze uta sitsiharawybabata bo inatakaha. Tapara ustska kytsta Sesus zinkylnaha, uta kino niwatihi ziharawy babata tu Sesus iny.

⁹ Iwaze ustska siakzohotsa kaokzeka myhyrizikwanitsa. Taparaka Sesus tuktsa ziknasisukyryky iwatahi kasikpybyrēta. Iwatahi utakta batu tyso:

— O utakta kamysapyrēta ba ziky iwatahi Deus zikwatawy iykozho my — my. Iwaha humo kasikpybyrēta. Hawa Deus tyryktsa ziknasisukyryky naha humo kasikpybyrēta.

¹⁰ Iwatatu kasopyksapybyita ikykara Deus zikpokzitsiki. Atahi zikwatawy iakzohota ikyzik. Utakta ustska siakzohotsa abazuba tarabajaziu mynakara. Kahyrinymyrēta my. Deus zikwy humo zuba tarabajaziu ikykara, izikwy humo kahyrizikporēta. Deus hi pikpunihiwyky iwa h̄y.

¹¹ Uta kaharere ustska Sesus ykzohotsa kino atsatu. Myzubaha sapyzeky Sesus nihyrikosokda iwaze Deus zihyrizikpowy tsimytsasokonaha.

Katsa Deus wasania ty ahabo tsiktsasokonaha.
Ana humo hi ahaspirikporētsa.

Katsa niwatihi Deus mynamyhyrizikpowy.

¹² Katsa tsimykaranaha:

— Deus Sesus Kiristu zihyrizikpowy
tsimykaranaha. Ikiahatsa ja. Wastuhu
mynakaranaha:

“Siakbatsaktsa batu ziknahyrizikponaha” —
mybarapetu mynakaranaha.

¹³ Iwa zeka — Deus Sesus Kiristu ba zikzi-
hyrizikpowy — maha.

¹⁴ Deus Sesus Kiristu tyhyrizikpowy ahaby-
izeka iwa zeka Deus wasaniha tsimytsasokonaha
zeka mybo zuba mysopyk. Myharere bo hyŷ
tsimykaranaha zeka baija tsimykaranaha.

¹⁵ Siharere humo wasani maha zeka, iwa mot-
sasonahaze Deus Kiristu ba zikyrizikpowyzo iwa
tsimaha zeka. Deus wasania ty tsimytsasonahaze
myspihikbatarētsa tsimoziknaha.

¹⁶ Deus siakbatsa ty isty hyrizikpowyzo ahaby-
izeka ahumo kino Kiristu ty ba tyhyrizikpowyzo.

¹⁷ Kiristu hyrizikpo ahabyi zeka ahamysapybyi
Deus ba zahaokzo. Nawa tsimykaranaha mytsaty
ahabyitsa tu tsimykaranaha.

¹⁸ Kiristu hyrizikpozo ahabyi zeka ituk niak-
bakanahatsa batu Deus tuk tawahi mynapykyryk-
naha. Siakbatsa Sesus humo nispirkpokona-
hatsa kino niwatihi sinini ykarawy bo ziktahas-
apynaha.

¹⁹ Katsa myspituze zuba Sesus myhumo mymy-
pokzitsiki, katsa tsimyokbanahaze myty pokzitsi

byizeka batu myku. Mysukatsihikrētsa. Ustsa kytsa sakurētsa katsa batu myku h̄y.

20 Siharere kino ba wasape zikaha. Deus hi Kiristu zihyrizikpowyze mybarawy ezektsa bo zi-watawyky:

— Siakbatsa mynahyrizikponaha — my. Iwa ziwatawyky. Iwatsahi asahi Sesus humo sispirikporētsa inahyrizikponaha myhyrinymyrētsa.

21 Mybarawy ezektsa Adāo isopyksapybyita nikara iwatsahi tsinahyrikosokdakanaha. Iwatsa mybarawy ezektsa Sesus Kiristu humo mynahyrizikponaha atahi imysapyrēnikita my.

22 Katsaktu Adāo iknyktsa iwatsahi tsimyhyrikosokdakanaha. Aba Sesus Kiristu humo myspirikporētsa myzubarētsa tsinahyrizikponaha h̄y.

23-27 Katsa Sesus humo Deus okzeka wasanitsa tsimaha. Tapara Kiristu zihyrizikpozo. Hawa eze Kiristu myziksizoze ituktsa mynahyrizikponaha. Asaktsa Kiristu humo sispirikporētsa asahi mynahyrizikponaha.

Kiristu abazubata mozik. Kytsa sizubarētsa iharere bo zuba hȳy mykaranaha. Deus sukyrytsitsa sizubarētsa sizikwy humo pepyk h̄y. Iwaze Kiristu harere bo zuba myzubarētsa hȳy mykaranaha. Isukyrytsa ziharawy babata pepyk. Abaka tsimyhyrikosokdanaha humo mypybyrētsa mysukyrytsa watsa my. Anahi mopyk. Sizubarētsa Kiristu harere bo zuba hȳy mykaranahaze batu mywahi zikyrikosokdanaha iwatsahi batu mypyby. Deus harere papeu humo botu ziwatahaka.

— Deus sizubarētsa sizikwy humo nepykbaik, Kiristu harere bo zuba kytса hyў mykaranaha. Izikwy zuba ba zikpyk — niy. Kiristu abazubata. Asahi Deus batu siakparawy sizikwy ty nepykbaik. Simy kzotsa sizubarētsa siharere humo nepykbaik. Hyrikoso sapybara harere humo zipykbaik. Sipaikwy siharere humo nepykbaik. Batu aty tohi siharere bo yhў mykaranaha. Deus harere bo zuba hyў mykaranaha. Kiristu ituktsa pe my:

— Abaka ikiahatsa Deus tyryktsa tsimoziknaha. Katarabajawы nepykba — my. Iwa myhў.

28 Myzubarētsa Kiristu harere bo hyў mykaranahaze Kiristu kino Deus harere bo hyў mykara. Kiristu tihi:

— O kazо ikia hi kytса myzubarētsa azikwy humo kaharere bo hyў mykaranaha. Abaka uta kino aharere bo hyў mykara — my. Iwaze Deus abazubata my. Mybarawy ezektsa, bi-jokpe ezektsa niwatihi atsaezubaha iharere bo zuba hyў mykaranaha, tahawahi iharere bo hyў mykaranaha. Deus hi mykzotsa babata mozik.

29 Wastuhu ahatuk sisopyk maha. Asaktsa Sesus humo sispirikporētsa siharasusuhubyitsa tu nihyrikosokdanaha iwatsahi ikiahatsa siakbatsa tsyhyryze tsikaharasusunaha. Deus siakbatsa isty hyrizikpozo byizeka iwaze batu tsimaha. Motsasokonahaze Deus siakbatsa ba ziknasihyrizikpowy mybarapetu mykaranaha. Ana harere bo yhў mykaranaha zeka amy humo sa siakbatsa tsyhyryze tsikaharasusukunaha.

30 Katsa ja, myzibyituhukutu asiba nimybabanaha tsikyrikosokdanaha. Kytsa

mymysukyrykynaha mymybeze tsihikiknaha Deus siakbatsa isty hyrizikpozo byizeka anawaze batu tsimyzurukunaha. Deus hi siakbatsa inasihyrizikpowy.

31 Ikiahatsa Sesus tuk isopykwy tu tsimykaranaha iharere bo hyŷ tsimykaranaha ana humo hi kakurēta. Iwaze katukytsa pibiyituhukutu asiba ikyrikosokda. Katsaktsa Sesus Kiristu ihyrizikpowy soho tsimytsasokonaha ana humo hi kytsa mymymysukyrykynaha ana kino my.

32 Anaeze Epeso eze asiba zikbezenaha. Kytsa asaktsa siererētsa zihuditukunaha asa hi asiba zikbezenaha. Kasukyrytsa parini watsa zikapikiknaha niy. Asaktsa sispirikpobyyitsa tihi:

— Abaka tsipadisahanaha. Tsipikunaha zuba. Tozeka ja byiri tsimyhyrikosokdanaha — maha. Iwa mykaranaha. Deus siakbatsa isty hyrizikpowyzo byizeka ana kino wasani my.

33 Ikiahatsa tu ba zikahaspikhbatanaha. Simysapybyitsa tuk mozurukunaha zeka ikiahatsa kino niwatihi siwatsa tsimyzurukunaha.

34 Hawa Deus mykara ahahyrinymyry byitsa tu. Ana ty hi motsaso kaharere humo ahasikpybyrētsa tsimoziknaha. Ahamysapybyity tsikykaranaha ka tsimoewynahaktsa! Wasani tahaktsa! Mytsaty mytsaty byitaha!

Mynahyrizikpo nahaze sa mynury ezytyk mozik.

35 Iwaze aty kape my:

— Deus hawa sa siakbatsa mynasihyrizikpo sinury ezytyk hawa sa my — nikara.

36 Ikiahatsa ahasopyksapybyitsa. Mynury batu atsa tu maha meky watu moziknaha. Siriktsa wa meky watu moziknaha. Mytsuhuk bo riktsa mysipariknahaze tawatsa. Deus humo meky watu mozik kyze mozipobaiknahaze wiharawaha tsimoziknaha.

37 Wihara ba zikparikiknaha riktsa zuba mysiparikik. Ahotsa ja mysiparikiknaha. Mekywa tu siriktsa sizubarētsa mysipariknaha.

38 Deus humo zuba siriktsa mozipobanaha, atahi riktsa mysiypykwykyk. Iwaze wihara moziknaha ihumo hi mozipobaiknaha, iwaze wihara myzik. Iwatsa tsimyhyrikosokdanahaze mynury meky watu mozik iriktsa watsa maha.

39 Abazubatsa sispiitu maha batu estuba zuba. Myzohotsa meky meky watu maha. Kytsani estuba my. Sasabyitsa meky meky watu maha. Sisarakatsa meky meky watu maha. Piknutsa kino meky meky watu maha.

40 Iwaze bijoboktsa rikatsa niwatihi. Asahi sisapyrētsa. Wytyk eze tu siharatsa asa kino niwatihi sisapyrētsa. Ana kino ba meky watu maha. Bijo ezektsa mekywa tu maha. Nanabyi tisapyrēna.

41 Bijoikpe ezektsa soho my. Haramwe karikpu karikpukrēta wytyk bo myzirikazowyky. Byzoje karikpu karikpukrēta wytyk bo myzirikazowyky. Byzoje karikpu karikpu niwatihi mekywa tu. Byrisoiktsa kino niwatihi sikarikpukarikpurētsa mekywa tu. Byrisoiktsa meky meky watu maha.

42 Siwatsa Deus siakbatsa mynashyrizikpowyze sinury meky watu moziknaha. Kytsa mymyhoroknahaze mynury mobibibaik. Deus mynahyrizikpowyze tawahi ba zikbibizo.

43 Kytsa mymyhoroknahaze mypaikbyrinaha. Deus mynamyhyrizikpowye mysapyrētsa tsimoziknaha. Mypunihikrētsa tsimoziknaha.

44 Myhyrikosokdanahaze kytsa mynury mytsahoroknaha. Katsa mybarawy ezektsa mynury mysuk wa. Deus mynamyhyrizikpowye meky watu tsimyziknaha. Deus hyrikoso humo myhyrizikararawy mynury ezytyk bo tasapy. Mybarawy ezektsa tu mynury mohyrikosokdanaha. Deus mynamyhyrizikpowy myhyrizikararawy mekywa tu tawahi tsimaha, ana humo kino Deus hyrikoso humo mybo nyny my.

45 Deus harere papeu humo iwatahaha:

— Deus taparakta Adāo inarokota Deus nizukni. Atakta wytyk tyty nizukni — niy. Iwaze usta izumu Kiristu inarokota. Atahi koikny baktatu my. Ata humo hi abazubatsa kytsa wytykyryk sihyrytsa iwatsa sisipitu maha.

46 Tapara mynury mybarawy ezektsa nury maha. Iwaze Deus hyrikoso humo utsa nury ty mybo nyny my. Ana humo ka ba zikarazonaha.

47 Deus Adāo taparakta wytyk tyty nizukni. Usta bijoikpe iknykta tu inasik mybarawy ezektsa bo niy Sesus Kiristu inarokota.

48 Katsa mybarawy ezektsa mynury taparakta Adāo watsa. Mynury wytyk suknihī maha. Kytsa Sesus Kiristu harere bo hȳ mykaranaha asaktsa meky watu sinury maha. Myhyrikosokdanahaze bijoikpe iknykta nury wata, Sesus Kiristu watsa sinury ezytyk myziknaha.

Hawa Sesus tuktsa tahawahi Deus tuk mynapykyryknaha.

⁴⁹ Abaka mynury Adāo nury watsa. Wytyk tyty nimysukni. Iwa Deus nimysukni. Aiba zuba katsa bijoikpe ezektsa watsa tsimoziknaha. Kiristu nury watsa tsimoziknaha atahi bijoikpe ikny inasikta.

⁵⁰ O katukytsa kamyrinymyrywy bo wabyz-iutaha! Myni myspu mynury iwa ha ba Deus tuk ziknapykyryk. Mobibibanaha ka, ba Deus tuk ziknapykyryk. Deus tyryktsa mysipehakaze iwaze batu aty tohi zikyrikosokda, iwatsahi ituk mywahi tsimynapykyryknaha.

⁵¹ Taparaka iktsasobara ana hi ahabo mot-sasoko. Hawa eze Sesus myziksizoze wastuhu botu niakbakanaha utsaktsa batu. Myzubarētsa Deus humo mekywa tu moziknaha. Ata humo hi atsoko mekywa tu tsimoziknaha.

⁵² Atsoko pyriā zuba mahaze kywa katsa Deus atsoko meky watu mymysuknizo. Bijoikpe ikny porawy wata ziharawy ty pypy myze atsoko mymysuknizo. Deus Sesus humo sispirikporētsa ziknakaranahatsa mynasihyrizikpoze sinury ezytyk moziknaha. Sinury ba zikbibizo. Katsa kino niwatihi myspitutsa tsimypykyryknahatsa porawy pypy myze meky watu tsimoziknaha. Mynury Deus humo ezytyk mozikzo.

⁵³ Mybarawy ezektsa myokbanahaze sinury mobibibanaha. Deus hi kytса Sesus humo sispirikporētsa ziknakaranahatsa sinury ezytyk mozikzo Deus mymysuknizo, bijoikpe ezekta wata ba zikykbazonaha ba zikbibinaha mywahi ituk tsinapykyryknaha.

54 Tubabatu Deus harere papeu humo iwata-haha:

— Myzubarētsa Deus harere bo hȳ tsimykarana-haze myhyrikosokdawy mohokda — niy.

Deus hi mybarawy ezektsa Sesus humo sispirikporētsa ziknakaranahatsa asaktsa sinury nibibinahatsa meky watu maha aba kino ana iwatahaha atsatu my.

55 Iwaze mora naha pokso ja ahapyby byihu!

Myhyrikosokdawy Deus zipykwy atahi mynamyhyrizikpowy iwaze mypybybyitsa zika ba sinini zikaha.

Sinini ykarawy bo ba zikmysapynaha zikaha.

Iwa myhyrikosokdawy mohokda.

56 Mysapybyiriwy humo hi tsimyhyrikosok-danaha. Deus harere mymywatawyky hawa ikiahatsa mysapybyi ty tsimykaranaha. Mysapybyi humo tsimykarana-haze Deus Sesus humo mymyokzohik.

57 Ihumo tsimypunihikrētsa tsimoziknaha. Tsimyhyrikosokdanaha pokso ja ba ahapyby. Kiristu harere bo zuba hȳ tynakaranaha. Katsa hi:

— O Deus myzo Sesus Kiristu humo ka mykurētsa. Ata myhumo tsimypokzitsiukrēta — tsimaha.

58 Iwatahi utakta ahape my:

— O katukytsa ahahumo kamypokzitsiarēta h̄y. Ana humo hi ahakubyrisorokuja! Batu paikpa mytsaty tsimaha. Ahatarabajawy humo Deus pahapehaze ana humo hi tarabajaziutahaktsa! Deus tarabajawy kytsa mysihyrinymyry wata. Tarabajaziu tsimykaranaha zeka izikwy humo

ahahyrinymyrētsa. Ahasopykziurētsa tsimozik-naha, Deus hi ahape “O kytsa tsipisapykynaha” — my.

16

Korītio ezektsa okyrysaro Sudeja ezektsa sinamybyikitsa bo nyny maha.

¹ Abaka okyrysaro soho humo pahahyrinymyry. Kytsa tarabaja maha humo okyrysaro ty ababo nyny maha zeka, ana ty hi tsapukte buruk metutu tsimaha iwaha tapery! Deus tyryktsa pokzi ahaokyrysaro tsipiperykynaha. Asaktsa Sudeja ezektsa sinamybyitsa bo nyny tsimaha. Karasia ezektsa asaktsa Sesus humo sispirikporētsa botu sibo iktasaso.

² Domiko eze tsimynazuzukuknahaze watu ahaokyrysaro ty tyzinykykynaha. Iwa tsipiperykynaha ababo mynakozoreze ba ziktsasonaha. Iwa tsimaha zeka ba:

— O Pauro mozumuku myokyrysaro ty zozotahaktsa — ba zikaha. Wastuhu ahatuk okyrysaro tsizubarēna, asahi okyrysaro tsizubarēna ty nyny maha. Ustsa ahatuk okyrysaro tsikaeni zuba zeka asaktsa okyrysaro tsikaeni zuba nyny maha.

³ Mynakozoreze kytsa Serusarēhe bo ahatsyhyryze mysipeha. Asahi mysiwatawynaha sibo papeu ty nyny my, ahawatawyhytsa soho piwataha. Kyze ahaokyrysaro kapapeu kino niwatihi pipeha Sudeja taparaktsa bo asahi Serusarēhe eze tu maha.

⁴ Wasani my zeka uta kino niwatihi situk Serusarēhe bo mokuru.

Pauro Korītio ezektsa bo mynakozore mykara eze tu.

⁵ Iwaze ababo mynakozore. Tapara Masedonia buruk my, anaezeka ba ziktare piharamu zuba.

⁶ Ahabaze pyk my zeka. Aidy zikybyita kahyrizikwatu my. Hyritsik mynawōze eze tozeka ja ahabaze motare. Iwaze tsipiktsumuēhīnaha moparakzoze ahanamy ty kabo nyny tsimaha iwaha humo tsipiktsumuēhīnaha. Iwa Deus my zeka yhŷ my.

⁷ Ababo mynakozore ahabaze pykare my.

⁸ Abaka Epeso eze mopykyryk. Pētekoste mymyikaha bo my. Bykyze zuba ikiahatsa bo moparak.

⁹ Anaeze kytsa sizubarētsa mysihyrinymyryky. Sizubarētsa Deus wasania ty ziwabytoktokonaha. Ustsa batu. Kaharere humo tahakyrikinaha. Sizubarētsa pikyknikinaha. Pikmyijakanaha iwatatuze sizubarētsa Sesus harere bo hyŷ mykaranaha.

¹⁰ Kyze Timoteo kaharaze ababo pomoze ahapokso ba ziktapyby! Kawata Deus tarabajawy humo pahahyrinymyryky iwaze tsipokzitsinahaktsa!

¹¹ Atahi mykyryburukta ihumo awatutaha. Mytsy myziksi naha taperyky. Iwatsahi tsitsumuēhī ihumo ahamypokzitsihu ahanamy ty ibo nnyntaha iwaze taokara humo tybyizuba ziu.

¹² Aba Aporo soho. Motsasoikik ipe:

— O katsy ikia niwatihi kytsa tuk Korītio ezektsa bo tsimy — my. Atahi:

— Korītio ezektsa bo ka aba nurūtuka. Ba zik-parak aibani zuba mynakozore. Tapara Epeso humo pepykze tu — niy.

Kaharere pepykyl.

¹³ Kapehawy bo hyŷ tahaktsa. Iwaze ahapuni-hiktsaktsa! Sesus humo ahaspirikporētsa Deus harere bo zuba pykyhytu hyŷ tsimykaranaha.

¹⁴ Tyharape pokzitsikinahaktsa!

¹⁵ O katukytsa Estepanus soho my. Estepanus tuktsa tsiksinyaha. Keresia ezekta atahi tapara anaeze Sesus humo tispirikporēta. Atatukytsa niwatihi Deus tyryktsa nisitsumuēhī ziknakaranaha.

¹⁶ Siharere bo yhŷ tsimykaranaha tyharapetsumuēhīnaha. Asaktsa Sesus humo tarabaja mykaranaha tysitsumuēhīnahaktsa!

¹⁷ Estepanus, Portunatus, Akaikus iwa ahatsa kabo zumunahaze, sihumo kakurēta ikykara. Iki-ahatsa nokponitsa tu tsimaha asaktsa ahatsy-hyryze ziktsumuēhīnaha.

¹⁸ Asahi pikykusukniwykynaha. Botu sihumo ahakurētsa abaka pikykusukniwykynaha. Kaokze wasanitsa maha, ahaokze kino niwatihi simysapyrētsa. Myziksizonahaze siharere bo ma tsimaha. Iwa hŷ tsimaha.

¹⁹ Iwaze Asia ezektsa asahi Sesus humo sispirikporētsa ahahumo sihyrizikbarētsa. Asaktsa katuk maha Akuiro, Perisira kino niwatihi Sesus humo sispirikporētsa siwahoro bo inazuzuknahaze asaktsa ahahumo sihyrizikbarētsa. Deus pe maha:

— O Deus Korītio ezektsa tysisapywyky — nikaranha.

20 Mytukytsa sizubarētsa astsatu ahabo maha.

Tyhapeharapyryknahaktsa iwa tsipi-watawynaha ahahumo ahamypokzitsirētsa tsimaha.

21 Atakta katsumuēhītsa tu kaharere ziwata-haka. Abaka uta katsyhyrytsa ty ahabo piwata-haka.

Uta Pauro ahabo piwatahaka papeu humo my, ikiahatsa humo kahyrizikbarēta.

22 — Aty mypehatsa iakparawy byizeka atahi sinini my – my. Kaharere niwatihi:

— *Maranatā O mypehaktsa aidy tyziksizo – my.*

23 Utahi:

— O Deus myzo Korītio ezektsa Sesus humo sispirikporētsa tysisapywykykta – my.

24 — O katukytsa katsa myzubarētsa Sesus humo myspirikporētsa iwatahi ahahumo kamypokzitsiukrēta – my. Iwa hÿ. Nawa zuba my.

Pauro

**Deus Harere Aibaky Sesus mymyspirikpoko
naha**

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
2f0260ea-5969-5180-9ac5-183d63a989f1